

Capítulo:	
Epígrafe:	

SUMARIO:

ORDE do 26 de decembro de 2025 pola que se establecen as bases e se regulan os procedementos para a concesión, en réxime de concorrència competitiva, de axudas para investimentos que fomenten a pesca sustentable para propietarios de buques pesqueiros cofinanciadas co Fondo Europeo Marítimo, de Pesca e de Acuicultura (FEMPA) e se convocan para o ano 2026 os devanditos procedementos, tramitados como expedientes anticipados de gasto (códigos dos procedementos PE120A, PE120B, PE120C e PE120E).

O Regulamento (UE) 2021/1139 do Parlamento Europeo e do Consello, do 7 de xullo de 2021, polo que se establece o Fondo Europeo Marítimo, de Pesca e de Acuicultura e polo que se modifica o Regulamento (UE) 2017/1004 (en adiante Regulamento FEMPA), xunto co Regulamento (UE) nº 2021/1060 do Parlamento Europeo e do Consello, de 24 de xuño de 2021, polo que se establecen as disposicións comúns relativas ao Fondo Europeo de Desenvolvemento Rexional (Feder), ao Fondo Social Europeo Plus (FSEP), ao Fondo de Cohesión, ao Fondo de Transición Xusta e ao Fondo Europeo Marítimo, de Pesca e de Acuicultura (FEMPA), así como as normas financeiras para os ditos fondos e para o Fondo de Asilo, Migración e Integración, o Fondo de Seguridade Interior e o Instrumento de Apoio Financeiro á Xestión de Fronteiras e a Política de Visados, constitúen o marco de financiamento comunitario para o período 2021-2027.

O Regulamento FEMPA establece, no seu artigo 3, que contribuirá á aplicación da Política Pesqueira Común (PPC) e da política marítima da Unión e que terá, como Prioridade 1, fomentar a pesca sustentable e a recuperación e conservación dos recursos biolóxicos acuáticos. O apoio no marco desta prioridade, que se desenvolve no capítulo II, abarcará as intervencións que contribúan á consecución dos obxectivos da PPC establecidos no artigo 2 do Regulamento (UE) nº 1380/2013, isto é, apoiar actuacións que fomenten un sector da pesca sustentable e respectuoso co medio ambiente para conseguir os obxectivos da PPC, por medio de, entre outros, os seguintes obxectivos específicos: os de reforzar as actividades pesqueiras que sexan económica, social e medioambientalmente sustentables e os de aumentar a eficiencia enerxética e reducir as emisións de CO2 mediante a substitución ou modernización de motores dos buques pesqueiros.

Ademais, mediante a Decisión do 29 de novembro de 2022, a Comisión aprobou o programa Fondo Europeo Marítimo, de Pesca e de Acuicultura, Programa para España para recibir axuda do Fondo Europeo Marítimo, de Pesca y de Acuicultura en España.

O sector da pesca constitúe un sector estratéxico para o desenvolvemento da nosa comunidade e ten que aproveitar ao máximo os fondos deste marco para conseguir os novos retos que se formulan e, neste sentido, tanto o sector extractivo como o sector transformador terán que aproveitar todas as posibilidades que brindan estes instrumentos para conseguir o obxectivo de ser un sector competitivo, sustentable e respectuoso co medio ambiente.

O artigo 1.1.1 da Orde do 11 de febreiro de 1998 (DOG núm. 34, do 19 de febreiro) sobre tramitación anticipada de expedientes de gasto, modificada pola Orde do 27 de novembro de 2000 (DOG núm. 231, do 29 de novembro) e pola Orde do 25 de outubro de 2001 (DOG núm. 209, do 29 de outubro), establece que os expedientes de gasto relativos ás subvencións se poderán iniciar sempre que as necesidades que se teñan que satisfacer poidan ser razoablemente previstas anticipadamente no exercicio inmediatamente anterior ao dos orzamentos con cargo aos cales se vaian imputar os correspondentes gastos, mesmo cando a súa execución se realice nunha ou en varias anualidades; no primeiro caso, sempre que exista crédito adecuado e suficiente no proxecto dos orzamentos xerais da Comunidade Autónoma de Galicia aprobado polo Consello da Xunta de Galicia que corresponda ao exercicio orzamentario no que se vaia materializar a contraprestación e, no segundo, sempre que exista crédito para a primeira anualidade e que se cumpran os requisitos do artigo 58 do Decreto legislativo 1/1999, do 7 de outubro, polo que se aproba o texto refundido da Lei de réxime financeiro e orzamentario de Galicia.

Ademais, o artigo 3.3.3 estende expresamente esta posibilidade de tramitación anticipada aos expedientes relativos ás bases reguladoras ou convocatorias de axudas derivadas da aplicación de regulamentos comunitarios con financiamento procedente de fondos europeos, sempre que exista regulación das axudas pola Unión Europea ou de ámbito estatal ditada en desenvolvemento ou transposición dela, e existan compromisos de financiamento destinados á aplicación das correspondentes medidas.

Segundo o Decreto 50/2021, do 11 de marzo, polo que se aproba a estrutura orgánica da Consellería do Mar, modificado polo Decreto 149/2024, do 20 de maio, correspóndelle á Dirección Xeral de Pesca, Acuicultura e Innovación Tecnolóxica tanto a promoción da competitividade dos produtos pesqueiros, marisqueiros e da acuicultura e o fomento da súa calidade, como a conservación, protección e xestión sostible dos recursos mariños.

En consecuencia, facendo uso das competencias que me confire a Lei 1/1983, do 22 de febreiro, de normas reguladoras da Xunta e da súa Presidencia, e demais normativa de aplicación, e oído o sector afectado,

DISPOÑO:

Artigo 1. *Obxecto*

Esta orde ten por obxecto establecer as bases reguladoras para a concesión, en réxime de concorrència competitiva, e a convocatoria para 2026, de axudas destinadas á realización de actuacións por parte de propietarios de buques pesqueiros para fomentar a pesca sustentable e a recuperación e conservación dos recursos biolóxicos acuáticos.

Os códigos dos procedementos administrativos regulados por esta orde son os seguintes:

- PE120A, para axudas dirixidas á diminución do efecto da pesca.
- PE120B, para axudas que melloren as condicións laborais e de seguridade a bordo:
 - Sen aumento de capacidade
 - Con aumento de capacidade
- PE120C, para axudas destinadas a aumentar a eficiencia enerxética e mitigación do cambio climático e/ou redución das emisións de CO₂.
 - Sen aumento de capacidade
 - Con aumento de capacidade
 - Cambio de motor
- PE120E, para axudas que aumenten o valor engadido, a economía circular e a seguridade alimentaria.

Artigo 2. *Definicións*

Para os efectos desta orde, aplicaranse as definicións do Regulamento (UE) nº 2021/1060 do Parlamento Europeo e do Consello, do 24 de xuño de 2021, do Regulamento (UE) nº 2021/1139 do Parlamento Europeo e do Consello, do 7 de xullo de 2021 e, na súa falta, a demais normativa de aplicación.

Artigo 3. *Finalidade das axudas*

Por procedemento, as axudas terán como finalidade realizar investimentos que:

– Procedemento PE120A: Reduzan o impacto da pesca no medio mariño, apoien a eliminación gradual dos descartes e faciliten a transición a unha explotación sostible dos recursos biolóxicos mariños de acordo co artigo 2, apartado 2, do Regulamento 1380/2013.

–Procedemento PE120B:

-Sen aumento de capacidade: Melloren a hixiene, a saúde, a seguridade e as condicións de traballo dos traballadores, fomentando así o relevo xeracional e o desenvolvemento profesional.

-Con aumento de capacidade: Melloren a seguridade e as condicións de traballo aumentando o arqueo bruto dun buque pesqueiro.

– Procedemento PE120C:

- Sen aumento de capacidade: Optimicen o uso da enerxía dos buques para contribuír á mitigación do cambio climático reducindo as súas emisións e o consumo de combustibles.

- Con aumento de capacidade: Melloren a eficiencia enerxética mediante operacións que aumenten o arqueo bruto dun buque pesqueiro.

- Cambio de motor: Apoien a substitución ou modernización dun motor principal ou auxiliar dun buque de pesca de ata 24 metros de eslora total.

– Procedemento PE120E: Incrementen a calidade, o valor engadido e a seguridade dos produtos pesqueiros, mediante o desenvolvemento de novos produtos e a valorización dos existentes, así como os subprodutos e capturas accidentais ou non desexadas que melloren a sustentabilidade da actividade pesqueira.

Artigo 4. *Crédito orzamentario*

1. Para o ano 2026 as axudas concederanse con cargo ás seguintes aplicacións orzamentarias correspondentes ao proxecto de orzamento de gasto da Consellería do Mar, sendo o importe total máximo das subvencións que se concedan no devandito exercicio orzamentario para cada unha delas, segundo a finalidade, o seguinte:

16.02.723A.770.0, código proxecto 2024.00148 (diminución do efecto da pesca): 500.000 €.

16.02.723A.770.0, código proxecto 2024.00147 (mellora das condicións laborais e de seguridade a bordo sen aumento de capacidade): 2.500.000 €

16.02.723A.770.0, código proxecto 2023.00188 (mellora das condicións laborais e de seguridade a bordo con aumento de capacidade): 400.000 €.

16.02.723A.770.0, código proxecto 2024.00146 (mellora da eficiencia enerxética e mitigación do cambio climático sen aumento de capacidade): 1.000.000 €.

16.02.723A.770.0, código proxecto 2023.00187 (mellora da eficiencia enerxética e mitigación do cambio climático con aumento de capacidade): 400.000 €.

16.02.723A.770.0, código de proxecto 2024.00144 (cambio de motor): 100.000 €.

16.02.723A.770.0, código proxecto 2024.00149 (incremento do valor engadido, da economía circular e da seguridade alimentaria): 1.500.000 €.

A concesión estará sometida á condición suspensiva de existencia de crédito axeitado e suficiente, no momento da resolución para o gasto a efectuar, no proxecto de orzamento de gastos para o ano 2026.

2. O período de elixibilidade do actual programa operativo (2021-2027), abrangue desde o 1 de xaneiro de 2021 ata o 31 de decembro de 2029, segundo dispón o artigo 63 punto 2 do Regulamento (UE) 2021/1060 do Parlamento Europeo e do Consello, do 24 de xuño de 2021, polo que se establecen as disposicións comúns relativas ao Fondo Europeo de Desenvolvemento Rexional, ao Fondo Social Europeo Plus, ao Fondo de Cohesión, ao Fondo de Transición Xusta e ao Fondo Europeo Marítimo, de Pesca e de Acuicultura, así como as normas financeiras para os devanditos Fondos e para o Fondo de Asilo, Migración e Integración, o Fondo de Seguridade Interior e o Instrumento de Apoio Financeiro á Xestión de Fronteiras e a Política de Visados

3. O importe fixado na presente convocatoria, así como as aplicacións ás que se impute, poderase ampliar no caso de que exista crédito dispoñible derivado dunha xeración, ampliación ou incorporación de crédito, de remanentes doutras convocatorias ou en calquera dos casos e coas condicións establecidas no número 2 do artigo 30 do Regulamento da Lei de subvencións de Galicia (Decreto 11/2009, do 8 de xaneiro), sen que iso dea lugar á apertura dun novo prazo de presentación de solicitudes, salvo indicación expresa en contrario na orde que se publique para o efecto.

4. A concesión das axudas queda condicionada á efectiva existencia de crédito adecuado e

suficiente no momento da resolución.

5. As axudas mencionadas contan co financiamento do FEMPA nun 70% e do Estado membro (CA de Galicia) nun 30%.

6. Poderanse adquirir compromisos de carácter plurianual de acordo co artigo 58 do Decreto legislativo 1/1999, do 7 de outubro, polo que se aproba o texto refundido da Lei de réxime financeiro e orzamentario de Galicia.

7. A tramitación deste expediente acóllese á Orde da Consellería de Economía e Facenda do 11 de febreiro de 1998, modificada polas Ordes do 27 de novembro de 2000, e de outubro de 2001, que regula a tramitación anticipada de expedientes de gasto, polo que a aprobación do expediente queda condicionada á efectiva existencia de crédito adecuado e suficiente na Lei de orzamentos da Comunidade Autónoma de Galicia para o ano 2026.

Artigo 5. Persoas beneficiarias e requisitos xerais.

Poderán ser beneficiarias as persoas físicas, xurídicas ou pluralidade de persoas físicas ou xurídicas, agrupacións ou entidades sen personalidade xurídica ou comunidades de bens que cumpran os seguintes requisitos:

1. Ser propietario dun buque de 3ª lista do Rexistro de Matrícula de Buques e Empresas Navieras.
2. O buque debe ter o seu porto base na Comunidade Autónoma de Galicia e atoparse de alta no Rexistro de Buques Pesqueiros da Comunidade Autónoma de Galicia e no Rexistro Xeral da Frota Pesqueira.
3. O buque para o cal se solicita axuda debe constituír un seguro que garanta a cobertura de danos a terceiros.
4. Os buques pesqueiros deberán ter levado a cabo actividades pesqueiras no mar durante polo menos 60 días nos dous anos civís anteriores ao ano de presentación da solicitude. O órgano xestor das axudas comprobará o cumprimento dos días de actividade pesqueira mediante sistemas de localización de buques. Se o buque non dispón destes dispositivos, a comprobación realizarase mediante a consulta dos datos dos rexistros oficiais de vendas. Tamén se poderán consultar outros medios que, a xuízo do devandito órgano, acrediten suficientemente a actividade pesqueira e/ou a zona de faena da devandita actividade.
5. No caso de buques cuxa primeira venda dos produtos que captura sexa en fresco e, polo tanto, obrigatoria en lonxa, o volume de vendas que se obteña da suma das notas de venda durante o ano

anterior ao da convocatoria deberá ser superior ao 50% da media obtida para ese porto base e polo segmento de frota que figura no Rexistro de Buques Pesqueiros de Galicia (RBPG).

6. No caso de buques para os que a primeira venda dos produtos que captura non sexa obrigada en lonxa, o buque debe dispoñer da autorización para realizar a devandita venda e debe transmitila ao órgano competente.

7. O buque non pode ter unha resolución desfavorable de regularización, salvo, que posteriormente se regularizase, para o que deberá asinar o Anexo IV.

8. Os investimentos para os que se solicite axuda non poderán estar iniciados nin pagados antes de que se acredite o non inicio deles, nos termos indicados no artigo 12 desta orde.

No caso de que o solicitante conte cunha certificación de non inicio anticipada, os investimentos non poderán estar finalizados nin completamente pagados antes de que se acredite, unha vez presentada a solicitude, a non finalización destes por parte dos servizos da Consellería do Mar. No caso de que o barco estea fóra da Comunidade Autónoma de Galicia, o órgano competente autorizará á persoa ou entidade encargada de facer esta certificación. Non obstante, o órgano competente poderá determinar que a inspección *in situ* se realice no porto base do buque.

9. Non estar incurso en ningunha das circunstancias previstas no artigo 13 da Lei 38/2003, do 17 de novembro, xeral de subvencións.

10. Non estar incurso en ningunha clase de inhabilitación para a obtención de axudas previstas nos apartados 2 e 3 do artigo 10 da Lei 9/2007, do 13 de xuño, de subvencións de Galicia.

11. Estar ao corrente no pagamento de obrigas por reintegro de subvencións, conforme ao artigo 10.2.g da Lei 9/2007, do 13 de xuño, de subvencións de Galicia, e o artigo 9 do Regulamento de subvencións de Galicia, aprobado polo Decreto 11/2009, do 8 de xaneiro.

12. Non atoparse en ningún dos supostos establecidos no apartado 1, letras a), b) do artigo 11 do Regulamento (UE) nº 2021/1139 do Parlamento Europeo e do Consello, do 7 de xullo de 2021:

- Ter cometido infraccións graves consonte o artigo 42 do Regulamento (CE) nº 1005/2008 do Consello ou o artigo 90 do Regulamento (CE) nº 1224/2009 do Consello, ou consonte a outros actos legislativos adoptados polo Parlamento Europeo e polo Consello no marco da PPC.
- Estar, ou ter estado involucrado nos últimos 24 meses, na explotación, xestión ou propiedade dalgún buque pesqueiro incluído na lista de buques INDNR da Unión Europea segundo dispón o artigo 40, apartado 3, do Regulamento (CE) nº 1005/2008, polo que se

establece un sistema comunitario para previr, desalentar e eliminar a pesca ilegal, non declarada e non regulamentada; estar, ou ter estado involucrado nos últimos 12 meses, na explotación, xestión ou propiedade dalgún buque que enarbore o pavillón dun país incluído na lista de terceiros países non cooperantes prevista no artigo 33 do citado regulamento.

13. No marco do FEMP ou FEMPA, non ter sido declarado culpable de cometer fraude, tal e como se define no artigo 3 da Directiva (UE) 2017/1371.

14. Ter capacidade administrativa, financeira e operativa para cumprir as condicións da axuda.

15. Antes de que se dite a proposta de resolución de concesión, deben estar ao corrente nas obrigas tributarias e coa Seguridade Social e non ter pendente de pago ningunha débeda, por ningún concepto, coa Administración pública da Comunidade Autónoma de Galicia.

16. Para subvencións de importe superior a 30.000 euros, as persoas físicas e xurídicas, distintas das entidades de dereito público, con ánimo de lucro, suxeitas á Lei 3/2004, do 29 de decembro, pola que se establecen medidas de loita contra a morosidade nas operacións comerciais, deberán acreditar cumprir, nos termos dispostos neste apartado, os prazos de pago que se establecen na citada Lei para obter a condición de persoa beneficiaria. Calquera financiamento que permita o cobro anticipado da empresa provedora considerárase válido para os efectos do cumprimento deste apartado, coa condición de que o seu custo corra a cargo do cliente e se realice sen posibilidade de recurso ao provedor, no caso de falta de pagamento.

A documentación acreditativa do nivel de cumprimento dos prazos legais de pago presentarase xunto coa solicitude da axuda. Con todo, se a certificación de auditor ou o informe de procedementos acordados non puidera obterse antes da terminación do prazo establecido para a súa presentación, achegárase xustificante de solicitar devandito medio de acreditación e, unha vez obtido, presentarase inmediatamente e, en todo caso, antes da resolución de concesión.

A acreditación do nivel de cumprimento establecido realizarase polos seguintes medios de proba:

i) As persoas físicas e xurídicas que, de acordo coa normativa contable poden presentar conta de perdas e ganancias abreviada, mediante certificación subscrita pola persoa física ou, no caso de persoas xurídicas, polo órgano de administración ou equivalente, con poder de representación suficiente, na que afirmen alcanzar o nivel de cumprimento dos prazos de pago previstos na citada Lei 3/2004, do 29 de decembro.

Poderán tamén acreditar a dita circunstancia por algún dos medios de proba previstos no apartado ii) seguinte e con suxeición á súa regulación.

ii) As persoas xurídicas que, de acordo coa normativa contable non poden presentar conta de perdas e ganancias abreviada, mediante:

1.º Certificación emitida por auditor rexistrado no Rexistro Oficial de Auditores de Contas que conteña unha transcripción desagregada da información en materia de pagos descrita na memoria das últimas contas anuais auditadas, cando delas se desprenda que se alcanza o nivel de cumprimento dos prazos de pago establecidos na Lei 3/2004, do 29 de decembro, determinado neste apartado, en base á información requirida pola disposición adicional terceira da Lei 15/2010, do 5 de xullo, de modificación da Lei 3/2004, do 29 de decembro.

Esta certificación será válida ata que resulten auditadas as contas anuais do exercicio seguinte.

2.º No caso de que non sexa posible emitir o certificado ao que se refire o número anterior, «Informe de Procedementos Acordados», elaborado por un auditor rexistrado no Rexistro Oficial de Auditores de Contas que, en base á revisión dunha mostra representativa das facturas pendentes de pago a provedores da sociedade a unha data de referencia, conclúa sen a detección de excepcións ao cumprimento dos prazos de pago da Lei 3/2004, do 29 de decembro, ou no caso de que se detectasen, estas non impidan alcanzar o nivel de cumprimento requirido no último parágrafo deste apartado.

Os informes de procedementos acordados ou as certificacións deberán realizarse segundo o establecido no artigo 215 do Real decreto-lei 5/2023, do 28 de xullo, polo que se modifica o Real decreto 887/2006, do 21 de xullo, polo que se aproba o Regulamento da Lei 38/2003, do 17 de novembro, xeral de subvencións.

Para os efectos da Lei 38/2003, de 17 de novembro, xeral de subvencións, entenderase cumprido o requisito esixido neste apartado cando o nivel de cumprimento dos prazos de pago previstos na Lei 3/2004, do 29 de decembro, sexa igual ou superior á porcentaxe prevista na disposición final sexta, letra d), apartado segundo, da Lei 18/2022, do 28 de setembro, de creación e crecemento de empresas.

17. Á solicitude xuntaráselle unha declaración responsable, por parte do solicitante ou do representante, do cumprimento dos requisitos establecidos nos puntos 9 a 16 deste artigo.

Artigo 6. *Requisitos específicos*

Sen prexuízo do anterior, segundo o tipo de axuda, deberánse cumprir os seguintes requisitos:

a) Para axudas dirixidas á diminución do efecto da pesca (PE120A): só se concederán cando poida demostrarse que a arte de pesca ou outros equipos contemplados posúen una maior selectividade

por talles ou menor impacto no ecosistema e nas especies non obxectivo que as artes ou outros equipos estándar autorizados en virtude da normativa da Unión. A xustificación realizarase mediante informes realizados por técnicos ou expertos independentes con competencias para a súa emisión, que demostren que os investimentos que reciben apoio teñen a capacidade de conseguir maior selectividade da arte de pesca, ou menor impacto, respecto doutros equipos estándar en virtude da normativa da Unión. O dito informe será considerado elixible no marco deste tipo de actividade.

b) Para axudas que melloren as condicións laborais e de seguridade a bordo (PE120B): unicamente se poderán conceder cando impliquen maiores exixencias que os requisitos normativos da Unión Europea, do Estado ou da nosa Comunidade Autónoma en vigor no momento da presentación da solicitude de axuda. Ademais, segundo o tipo de axuda, será necesario que:

b.1) Sen aumento de capacidade:

Poderanse financiar os investimentos a bordo ou a adquisición de equipos que, na data da solicitude da axuda, acrediten de forma clara que o investimento, sendo máis exixente que o requirido pola normativa, mellora a seguridade, a saúde ou as condicións de traballo a bordo e non incrementa a capacidade de pesca.

Para os investimentos que se relacionan nas letras da w á aa do artigo 10.1.B no apartado de seguridade, é obrigatorio un informe realizado por técnico ou experto independente con competencia para a súa emisión, que xustifique a actuación coa mellora da seguridade a bordo e que acredite o non aumento de capacidade nin de habilidade para detectar peixe.

b.2) Con aumento de capacidade:

O buque terá que pertencer, no momento da concesión e do pago, a un segmento da frota respecto do que o último informe sobre capacidade de pesca a que se refire o artigo 22, apartado 2, do Regulamento (UE) nº 1380/2013 amose un equilibrio entre a capacidade pesqueira do segmento coas posibilidades de pesca dispoñibles para o dito segmento; cada ano, no informe de frota publicarase a lista de buques coa asignación do seu segmento e a información sobre a situación de equilibrio e desequilibrio do dito segmento.

O buque non poderá ter máis de 24 metros de eslora total.

O buque ten que estar inscrito no Rexistro Xeral da Frota Pesqueira dende, polo menos, os dez anos civís previos ao ano de presentación da solicitude.

A entrada na frota pesqueira de nova capacidade pesqueira xerada pola operación debe compensarse coa retirada previa de, polo menos, a mesma cantidade de capacidade pesqueira sen

axuda pública do mesmo segmento da frota ou dun segmento da frota para o que o informe máis recente sobre capacidade pesqueira, mencionado no artigo 22, apartado 2, do Regulamento (UE) nº 1380/2013, puxera en evidencia que a capacidade pesqueira non está en equilibrio coas posibilidades de pesca dispoñibles para tal segmento. A potencial persoa beneficiaria achegará, xunto coa solicitude, os GTs adicionais que utilizará na obra e indicará o buque de procedencia dos ditos GTs.

No momento do pago deberá contar coa resolución de autorización da Comunidade Autónoma de Galicia do expediente de entrada de capacidade, onde deberán figurar e comprobarse a orixe dos GTs utilizados.

c) Para axudas que teñan por finalidade mellorar a eficiencia enerxética e mitigar o cambio climático e/ou reducir as emisións de CO₂ (PE120C)

c.1) Sen aumento de capacidade:

Para estabilizadores ou quillas de balance ou flaps nas operacións que teñan como obxectivo mellorar a hidrodinámica do casco, é necesario informe/auditoría enerxética de aforro de combustible emitido por un técnico especialista independente con competencia para a súa emisión.

No caso das operacións que teñan como finalidade mellorar o sistema de propulsión dos buques, todas deberán dispoñer de informe técnico que indique que a operación non incrementa a capacidade do buque. Ademais, no caso de novas tobeiras para mellorar o sistema de propulsión, deberán dispoñer dunha auditoría enerxética de aforro de combustible emitida por un técnico ou experto independente con competencia para a súa emisión e, no caso de modificación ou cambios de portas, requírese informe enerxético de aforro de combustible emitido por un técnico ou experto independente con competencia para a súa emisión.

Para as operacións que teñan por obxecto as artes de pesca, aparellos e utensilios de pesca, deberá constar informe de técnico ou experto independente, con competencia para a súa emisión, expresivo de que non se pon en perigo a selectividade desa arte de pesca, e informe/auditoría enerxética de aforro de combustible realizado por un técnico ou experto independente con competencia para a súa emisión.

Os informes e/ou a auditoría enerxética de aforro de combustible por técnico especialista, nos casos que proceda, son elixibles.

c.2) Con aumento de capacidade:

O buque terá que pertencer, no momento da concesión e do pago, a un segmento da frota respecto do cal o último informe sobre capacidade de pesca a que se refire o artigo 22, apartado 2,

do Regulamento (UE) nº 1380/2013, amose un equilibrio entre a capacidade pesqueira do segmento coas posibilidades de pesca dispoñibles para o dito segmento; cada ano, no informe de frota publicarase a lista de buques coa asignación do seu segmento e a información sobre a situación de equilibrio e desequilibrio do dito segmento.

O buque no poderá ter máis de 24 metros de eslora total.

O buque ten que estar inscrito no Rexistro Xeral da Frota Pesqueira dende, polo menos, os dez anos civís previos ao ano de presentación da solicitude.

A entrada na frota pesqueira de nova capacidade pesqueira xerada pola operación debe compensarse coa retirada previa de, polo menos, a mesma cantidade de capacidade pesqueira sen axuda pública do mesmo segmento da frota ou dun segmento da frota para o que o informe máis recente sobre capacidade pesqueira, mencionado no artigo 22, apartado 2, do Regulamento (UE) nº 1380/2013, puxera en evidencia que a capacidade pesqueira non está en equilibrio coas posibilidades de pesca dispoñibles para tal segmento. A potencial persoa beneficiaria achegará, xunto coa solicitude, os GTs adicionais que utilizará na obra e indicará o buque de procedencia de ditos GTs.

Será necesario presentar informe/auditoría enerxética de aforro de combustible por técnico especialista, que será elixible.

No momento do pago deberá contar coa resolución de autorización da Comunidade Autónoma de Galicia con respecto ao expediente de entrada de capacidade, onde deberán figurar e comprobarse a orixe dos GTs utilizados.

c.3) Cambio de motor:

Para a substitución ou modernización de motores principais ou auxiliares é necesario que:

- Que o buque de pesca pertenza a un segmento da frota respecto do cal o último informe sobre capacidade de pesca a que se refire o artigo 22, apartado 2, do Regulamento (UE) nº 1380/2013 mostre un equilibrio coas posibilidades de pesca dispoñibles para o devandito segmento. Cada ano, no informe de frota publicarase a lista de buques coa asignación do seu segmento e a información sobre a situación de equilibrio e desequilibrio do devandito segmento.
- Que o buque de pesca non teña máis de 24 metros de eslora total.
- Que o buque de pesca estea rexistrado no Rexistro Xeral da Frota Pesqueira durante, polo menos, os cinco anos civís previos ao ano de presentación da solicitude de apoio.

Ademais, a axuda destinada á substitución ou modernización de motores principais ou auxiliares poderá concederse soamente:

- Para o caso dos buques de pesca costeira artesanal, nos que a potencia en kW do motor novo ou modernizado non supere á do motor existente.

- No caso do resto dos buques, cuxa eslora total non exceda de 24 metros, nos que o motor novo ou modernizado teña unha potencia en kW non superior á do motor existente e emita, como mínimo, un 20 % menos de CO₂ que o motor existente, considerárase alcanzada a redución das emisións de CO₂ requirida en calquera dos casos seguintes:

i) Cando a información pertinente certificada polo fabricante dos motores novos ou modernizados, como parte dunha homologación de tipo ou un certificado de produto, indique que o motor novo ou modernizado emite, polo menos, un 20 % menos de CO₂ que o motor substituído.

ii) Cando a información pertinente certificada polo fabricante dos motores novos ou modernizados, como parte dunha homologación de tipo ou un certificado de produto, indique que o motor novo ou modernizado utiliza, polo menos, un 20 % menos de combustible que o motor substituído.

iii) Cando a información pertinente certificada polo fabricante dos motores correspondente, como parte dunha homologación de tipo ou un certificado de produto, para un ou ambos os dous motores non permita comparar as emisións de CO₂ ou o consumo de combustible, considerárase que se alcanzou a redución das emisións de CO₂ esixida en calquera dos casos seguintes:

iii.1) Se o novo motor utiliza unha tecnoloxía eficiente desde o punto de vista enerxético e a diferenza de idade entre o novo motor e o motor substituído é de, polo menos, sete anos. Terán a consideración de tecnoloxía eficiente, de acordo co Regulamento de execución 2022/46, as seguintes:

- Hidróxeno
- Amoníaco
- Combustión interna
- Pilas de combustible
- Electricidade
- Unha combinación de electricidade e combustión (híbridos)
- Un sistema híbrido de pilas de combustible.

-Dispoñan dunha homologación de tipo de conformidade co Regulamento (UE) 2016/1628 do Parlamento Europeo e do Consello.

iii.2) Se o novo motor utiliza un tipo de combustible ou un sistema de propulsión do que se considera emite menos CO₂ que o motor substituído.

iii.3) Segundo a medición do Estado membro, se o novo motor emite un 20 % menos de CO₂ ou utiliza un 20 % menos de combustible que o motor substituído con arranxo ao esforzo pesqueiro normal do buque correspondente. Para estes efectos aplicarase o disposto no artigo 2 do Regulamento de Execución (UE) 2022/46.

- Non se substituirá a capacidade pesqueira retirada debido ao cambio ou modernización dun motor principal ou auxiliar.
- O motor substituído ou modernizado será obxecto dunha verificación física.

d) Para axudas que contribúan a aumentar o valor engadido, a economía circular e a seguridade alimentaria (PE120E):

– As capturas non desexadas correspondentes a capturas de talle inferior ao talle mínimo de referencia de especies suxeitas á obriga de desembarque, só poderán empregarse para fins distintos do consumo humano directo, como fariñas ou aceite de pescado, penso para animais de compañía, aditivos alimentarios, produtos farmacéuticos e cosméticos (Art.15.11 RPPC).

Artigo 7. Obrigas xerais das persoas beneficiarias

As persoas beneficiarias destas axudas están obrigadas a:

a) Executar as actuacións obxecto da subvención dentro do prazo conferido para o efecto, e con cumprimento das condicións establecidas na respectiva resolución de concesión e demais normativa de aplicación.

b) Durante os cinco anos seguintes ao pago final á persoa beneficiaria, que será a data contable do último pagamento, esta non pode:

- Cesar na actividade produtiva, nin, no caso de agrupacións ou entidades sen personalidade xurídica e comunidades de bens, disolverse ata que finalice o devandito prazo.

- Relocalizar a actividade produtiva fóra de Galicia.

- Cambiar a propiedade da infraestrutura ou dun elemento da infraestrutura de forma que proporcione unha vantaxe indebida e sen autorización expresa do órgano concedente.

- Producir cambios substanciais que afecten á natureza, aos obxectivos ou ás condicións de execución da operación, de modo que se menoscaben os seus obxectivos orixinais.

- O buque non poderá ser transferido fóra de la Unión nin reabandeirado con pavillón de fóra da Unión.

A Consellería do Mar solicitará o reintegro da axuda de forma proporcional ao período durante o que se incumpriron os requisitos, segundo o disposto no artigo 65 do Regulamento (UE) nº 2021/1060.

c) Someterse ás actuacións de comprobación que efectuará o órgano concedente ou calquera outra de comprobación ou control financeiro que poidan realizar os órganos de control competente, tanto nacionais como comunitarios, e achegar tanta información lles sexa requirida no exercicio das actuacións anteriores.

d) Conservar os documentos xustificativos da aplicación dos fondos recibidos durante un prazo de cinco anos a partir do 31 de decembro do ano da data contable do último pagamento, para os efectos de comprobación e control. Cando proceda, deberá dispoñer dos libros contables, rexistros dilixenciados e demais documentos esixidos na lexislación aplicable ás persoas beneficiarias.

e) Manter un sistema de contabilidade separado ou un código contable específico en relación con todas as transaccións relacionadas coa subvención que permita seguir a pista de auditoría.

f) Comunicarlle á Consellería do Mar a obtención doutras subvencións e axudas para a mesma finalidade, procedentes de calquera administración ou ente, tanto público como privado.

g) Comunicarlle á Consellería do Mar calquera circunstancia que poida afectar substancialmente á execución dos fins para os que foi concedida a axuda.

h) Dar a adecuada publicidade ao carácter público do financiamento do investimento realizado, con expresa mención á participación do FEMPA:

1. Cando as persoas beneficiarias dispoñan dun sitio web e de contas en medios sociais farán unha breve descrición da operación, de maneira proporcionada en relación co nivel da axuda, cos seus obxectivos e resultados, e destacarán a axuda financeira da Unión.

2. En documentos e materiais de comunicación relacionados coa execución da operación, destinados ao público ou aos participantes, proporcionarán unha declaración que destaque a axuda da Unión de maneira visible.

3. Exibirán placas ou valos publicitarios resistentes nun lugar ben visible para o público, nas que figure o emblema da Unión, tan pronto como comece a execución física de operacións que impliquen investimentos físicos ou se instalen os equipos que se adquiriron, con respecto a operacións cuxo custo total sexa superior a 100.000,00 €.

4. Para as operacións que non se inclúan no punto 3, exhibirán nun lugar ben visible para o público polo menos un cartel de tamaño mínimo A3 ou unha pantalla electrónica equivalente con información sobre a operación onde se destaque a axuda dos Fondos; nos casos nos que a persoa beneficiaria sexa unha persoa física, a devandita persoa beneficiaria asegurará, na medida do posible, a dispoñibilidade de información adecuada onde se destaque a axuda dos Fondos, nun lugar visible para o público ou mediante unha pantalla electrónica.

5. Para as operacións de importancia estratéxica e as operacións cuxo custo total sexa superior a 10.000.000,00 €, organizarán unha actividade ou acto de comunicación, segundo conveña, e farán participar á Comisión e á autoridade de xestión responsable no seu momento oportuno.

En calquera actuación incluírán, así mesmo, o logotipo da Xunta de Galicia.

A utilización do emblema da Unión realizarase conforme ao disposto no artigo 47 e no Anexo IX do Regulamento (UE) 2021/1060 do Parlamento Europeo e do Consello, do 24 de xuño de 2021.

O incumprimento das obrigas da persoa beneficiaria, ademais da mala utilización do emblema da UE, sen a adopción de medidas correctoras, fará que se poida cancelar ata un máximo do 3% da axuda do FEMPA á operación.

i) Non incorrer, durante un período comprendido entre a presentación da solicitude da axuda e os cinco anos seguintes á materialización do pago final, nalgunha das situacións ás que fai referencia o artigo 5.12 desta Orde. Se calquera desas situacións se produce durante o dito período, deberá reintegrar, total ou parcialmente, o importe da axuda, de conformidade co establecido no artigo 44 do Regulamento FEMPA e no artigo 103 do Regulamento (UE) 2021/1060.

j) Respetar a Carta dos dereitos fundamentais da Unión Europea. Ter en conta a promoción e a igualdade entre mulleres e homes, e a non discriminación. Evitar calquera discriminación por razón de xénero, orixe racial ou étnica, relixión ou conviccións, discapacidade, idade ou orientación sexual, e ter en conta a accesibilidade para as persoas con discapacidade, de ser o caso.

Artigo 8. Obrigas específicas das persoas beneficiarias

Sen prexuízo do anterior, segundo o tipo de axuda, a persoa beneficiaria deberá cumprir, ademais, os seguintes requisitos:

En investimentos en hixiene, saúde, seguridade ou condicións de traballo na pesca que sexan consumibles (por exemplo os medicamentos) ou funxibles, non poderán atoparse caducados, en ningún caso, no período de cinco anos. Se a caducidade fose menor ou fosen consumidos nese período, a persoa beneficiaria deberá repoñelos; serán admisibles, para estes efectos, produtos cuxo efecto sexa similar ao ben subvencionado.

No caso de investimentos inmateriais (campañas informativas, estudos, ...) deberá existir unha actualización nos manuais, campañas, guías, etc. durante o período de 5 anos, se o buque sofre unha modificación da infraestrutura, proceso, tecnoloxía,... que afecte á finalidade do investimento subvencionado.

Artigo 9. Investimento máximo subvencionable e intensidade das axudas

1. As axudas reguladas nesta Orde teñen o carácter de subvencións de capital e non constitúen axudas de Estado.

2. Nas axudas cuxa finalidade sexa a realización dun investimento, o importe do investimento subvencionable será o que se obteña da valoración das obras ou investimentos con criterios técnico-económicos, obxectivos e homoxéneos, de acordo cos informes emitidos.

3. A contía máxima da axuda, conforme ao disposto no artigo 41 do Regulamento FEMPA, será o 50% do investimento máximo subvencionable ao que se refire o punto 2 deste artigo, excepto no caso de operacións que melloren as condicións laborais e de seguridade a bordo, que será do 75%; ademais, cando o buque sexa de pesca costeira artesanal ou no caso de operacións que melloren a

selectividade por talles ou especies das artes de pesca, será do 100 %; con todo, cando se trate da substitución ou modernización de motor, investimentos que melloren as condicións laborais e de seguridade a bordo con aumento de capacidade ou investimentos en eficiencia enerxética e mitigación do cambio climático con aumento de capacidade, será como máximo do 40 %.

Artigo 10. *Investimentos obxecto de subvención e gastos subvencionables*

1. Os investimentos que, sen tratarse dunha lista pechada, poderán ser obxecto de subvención son, entre outros, os seguintes:

A. Investimentos dirixidos á diminución do efecto da pesca que se refiran a :

* Equipos máis selectivos que diminúan a capacidade de pesca e/ou aumenten a selectividade por talles ou especies das artes de pesca; en particular, aqueles métodos e artes de pesca compatibles coa xestión ambiental das zonas de pesca naqueles espazos da Rede Natura 2000.

* Equipos ou medidas técnicas que minimicen o risco de capturas accidentais de grandes organismos mariños, tales como mamíferos, aves, tartarugas e elasmobranquios vulnerables.

* Equipos para eliminar os descartes, evitando e reducindo as capturas non desexadas de poboacións comerciais ou para tratar as capturas non desexadas que deban desembarcarse de acordo co artigo 15 do Regulamento (UE) nº 1380/2013.

* Equipos que limiten e/ou eliminen os efectos físicos e biolóxicos das actividades pesqueiras no ecosistema, con outros seres vivos ou no fondo mariño.

* Equipos para protexer as artes de pesca e as capturas fronte aos mamíferos e ás aves protexidas pola Directiva 92/43/CEE ou pola Directiva 2009/147/CE do Parlamento Europeo e do Consello, coa condición de que non se limite a selectividade das artes de pesca e se apliquen todas as medidas idóneas para evitar o dano físico aos predadores. Inclúese o apoio a métodos e artes de pesca en zonas mariñas Rede Natura 2000 no Marco de Acción Prioritaria.

Igualmente serán subvencionables os informes emitidos por técnicos ou expertos independentes con competencia para a súa emisión, esixidos para a concesión destas axudas.

B. Investimentos que melloren as condicións laborais e de seguridade a bordo.

Os investimentos subvencionables por tipo de actividade, indícanse a continuación.

B.1 Sen aumento de capacidade. Serán subvencionables os investimentos que se refiran a:

* Hixiene:

a) Instalacións sanitarias tales como aseos e lavabos; b) cociñas e equipos de almacenamento de produtos alimenticios; c) depuradoras de auga para a produción de auga potable; d) equipos ou sistemas de ventilación, limpeza e/ou desinfección para manter a bordo as condicións sanitarias idóneas; e) guías e manuais para a mellora da hixiene a bordo, ferramentas informáticas incluídas.

* Saúde:

a) A compra e a instalación de caixas de primeiros auxilios; b) a compra de medicamentos e de dispositivos para tratamentos de urxencia a bordo; c) a subministración de servizos de telemedicina, incluídos os equipamentos, as tecnoloxías electrónicas e os dispositivos de imaxes médicas aplicados á consulta a distancia desde os buques; d) a adquisición de guías e manuais para mellorar a saúde a bordo; e) as campañas de información destinadas a mellorar a saúde a bordo.

* Seguridade:

a) Protección de abrigo; b) balsas salvavidas; c) unidades de destrincaxe hidrostática para balsas salvavidas; d) radiobalizas de localización persoal que, como as radiobalizas de localización de sinistros (RBLs), poidan integrarse nos chalecos salvavidas e na roupa de traballo das persoas pescadoras; e) dispositivos de flotación persoal, especialmente traxes de inmersión ou de supervivencia e aros e chalecos salvavidas; f) bengalas para sinais de socorro; g) aparellos lanzacabos; h) equipamento que facilite a supervivencia en caso de abandono, caída do buque, etc.; sistemas de salvamento en casos de «home á auga»; i) dispositivos de prevención/detección e loita contra incendios, como extintores, mantas ignífugas, detectores de fume ou lume e aparellos de respiración; j) prevención de afundimentos, caídas á auga, accidentes por atrapamento ou esvaramento ou golpes ou cortes, etc.; k) radares banda X que diminúan o risco de colisión; l) portas tornalumes; m) válvulas de peche do depósito de combustible; n) detectores de gas e sistemas de alarma de gas; ñ) bombas de achique e alarmas; o) equipos de radio e de comunicacións por satélite; p) trapelas e portas estancas; q) gardamáquinas para máquinas tales como guinches ou estibadores de rede; r) pasarelas e escadas de acceso; s) iluminación de cuberta, de emerxencia ou para procuras; t) mecanismos de seguridade para os casos nos que as artes de pesca queden bloqueadas por algún obstáculo situado por debaixo da superficie; u) monitores e cámaras de seguridade; v) equipos e demais elementos necesarios para mellorar a seguridade da cuberta; w) modernización relativa ao temón e ao pau do temón; x) modernización relativa a hélices de manobra; y) modernización do pau pescante ou pescante de popa en buques de arrastre; z) modernización no cadro de luces/instalación eléctrica; aa) adquisición e instalación de haladores e outros aparellos de levantamento e recollida de artes -rulo, guindastre, estibadores, maquinillas, tambores de rede para o almacenamento das artes en buques de pesca-.

No caso dos investimentos relacionados nas letras da w á aa tamén será subvencionable o informe técnico, de obrigada presentación, que xustifique a actuación coa mellora da seguridade a bordo e que xustifique o non aumento de capacidade nin de habilidade para detectar peixe.

* Condicións laborais:

a) Equipos e equipamentos radioeléctricos e mellora de la conectividade que faciliten as condiciones de vida da tripulación a bordo; b) varandas de cuberta; c) estruturas de cuberta de abrigo e elementos de modernización dos camarotes que protexan das condicións meteorolóxicas adversas; d) elementos para a mellora da seguridade dos camarotes e o establecemento de zonas comúns para a tripulación, e) equipos para alixeirar o levantamento manual de cargas pesadas, con exclusión das máquinas utilizadas directamente nas operacións de pesca, como, por exemplo, os guinches; f) pintura e alfombras de goma antiescorregadiza; g) material de illamento contra o ruído, a calor ou o frío e equipos para mellorar a ventilación; h) roupas de traballo e equipos de seguridade tales como botas de seguridade impermeables, dispositivos de protección respiratoria e ocular, luvas, arneses, prismáticos e cascos de protección ou equipos de protección contra as caídas, incluíndose os traballadores/as en terra; i) sinais de emerxencia, de seguridade e de alerta; j) análises e avaliacións que determinen os riscos que corren as persoas pescadoras a bordo ou en terra, no exercicio directo ou indirecto da súa actividade profesional, co fin de adoptar medidas para previlos ou reducilos; k) guías e manuais para a mellora das condicións de traballo a bordo; l) reformas sobre habitabilidade que faciliten a incorporación da muller como tripulación.

* Ademais dos investimentos mencionados, poderanse realizar estudos e proxectos piloto no ámbito da seguridade a bordo e a mellora das condicións de traballo.

Non serán subvencionables aqueles investimentos nos que o importe da axuda ou o aboamento á persoa beneficiaria resulte inferior a 600 euros.

B.2 Con aumento de capacidade. Para os efectos do apartado 1 do artigo 19 do Regulamento 2021/1139, soamente serán subvencionables no marco deste tipo de actividade as seguintes operacións:

a) O aumento do arqueo bruto necesario para a posterior instalación ou renovación de instalacións de aloxamento dedicadas ao uso exclusivo da tripulación, incluídas as instalacións sanitarias, as zonas comúns, as instalacións de cociña e as estruturas de cuberta de abrigo;

b) O aumento do arqueo bruto necesario para a posterior mellora ou instalación de sistemas de prevención de incendios a bordo, sistemas de seguridade e alarma ou sistemas de redución do ruído.

C. Investimentos en eficiencia enerxética e mitigación do cambio climático ou redución das emisións de CO₂:

Os investimentos subvencionables por tipo de actividade, indícanse a continuación.

C.1 Eficiencia enerxética e mitigación do cambio climático sen aumento de capacidade. Serán subvencionables os investimentos que se refiran a:

* Operacións que teñan como obxectivo mellorar a hidrodinámica do casco dos buques:

- a. Os investimentos en mecanismos de estabilidade que, como as quillas de sentina e os bulbos de proa, contribúan a mellorar o funcionamento dos buques no mar e a súa estabilidade.
- b. Estabilizadores ou quillas de balance ou flaps. É necesario informe/auditoría enerxética de aforro de combustible por un técnico especialista independente con competencia para a súa emisión.
- c. Os gastos derivados do uso de produtos antiincrustantes non tóxicos que, como os revestimentos de cobre, reduzan a fricción.
- d. Os custos relacionados co aparello de goberno, como, por exemplo, os sistemas de mando do aparello de goberno ou os temóns múltiples que reducen o movemento do temón en función das condicións meteorolóxicas e do estado do mar.
- e. O custo dos ensaios de depósitos que teñan por obxecto achegar unha base para mellorar as características hidrodinámicas dos buques.

* Operacións que teñan como finalidade mellorar o sistema de propulsión das embarcacións pesqueiras. Todas deberán dispoñer de informe técnico que indique que a operación non incrementa a capacidade do buque:

- a. As hélices enerxeticamente eficientes, incluídas as árbores de transmisión.
- b. Os catalizadores
- c. Os xeradores enerxeticamente eficientes, como, por exemplo, os que utilicen hidróxeno ou gas natural.
- d. Os elementos de propulsión que utilicen fontes de enerxía renovables, como, por exemplo, velas, cometas, aeróxeradores, turbinas ou paneis solares.
- e. Os temóns proeles.

f. A conversión dos elementos do buque ás adaptacións necesarias para o funcionamento con biocombustibles ou outros combustibles alternativos.

g. Os economómetros, os sistemas de xestión do combustible e os sistemas de seguimento.

h. Novas toberas para mellorar o sistema de propulsión, só no caso de que se dispoña dunha auditoría enerxética de aforro de combustible emitida por un técnico ou experto independente con competencia para a súa emisión

i. Modificación ou cambios de portas. Require informe enerxético de aforro de combustible por un técnico ou experto independente con competencia para a súa emisión.

* Operacións que teñan como obxecto reducir o consumo de electricidade ou de enerxía térmica:

a. Investimentos destinados a mellorar a refrixeración, a conxelación ou os sistemas de illamento das embarcacións.

b. Investimentos que fomenten a reciclaxe de calor dentro dos buques con vistas á súa recuperación e reutilización para operacións auxiliares a bordo.

* Investimentos que teñan por obxecto as artes de pesca, aparellos e utensilios de pesca por outros máis eficientes enerxeticamente. Deberá constar informe de técnico ou experto independente, con competencia para a súa emisión, de que non se pon en perigo a selectividade desa arte de pesca, e informe /auditoría enerxética de aforro de combustible realizado por un técnico ou experto independente con competencia para a súa emisión.

* Auditorías, programas e estudos piloto de eficiencia enerxética.

Ademais, tamén serán subvencionables o informe/auditoría enerxética de aforro de combustible e o informe sobre a selectividade da arte de pesca, de presentación obrigatoria nos casos indicados.

C.2 Eficiencia enerxética e mitigación do cambio climático con aumento de capacidade. Para os efectos do apartado 1 do artigo 19 do Regulamento 2021/1139, soamente serán subvencionables no marco deste tipo de actividade as seguintes operacións:

a) O aumento do arqueo bruto necesario para a posterior instalación de sistemas integrados de ponte que melloren a navegación ou o control do motor.

b) O aumento do arqueo bruto necesario para a posterior instalación ou renovación dun motor ou sistema de propulsión que demostre unha maior eficiencia enerxética ou unha redución das emisións de CO₂ en comparación coa situación anterior, que non teña unha potencia superior á potencia motriz

previamente certificada do buque de pesca, e cuxa potencia máxima estea certificada polo fabricante para ese modelo de motor ou sistema de propulsión.

c) A substitución ou renovación do bulbo de proa, sempre que mellore a eficiencia enerxética global do buque de pesca.

A maiores será subvencionable o informe/auditoría enerxética de aforro de combustible por técnico especialista, de presentación obrigatoria para a concesión destes investimentos.

C.3 Cambio de motor:

* Substitución ou modernización dos motores principais ou auxiliares dos buques de pesca que pertencen a un segmento de frota respecto do que o informe de capacidade pesqueira, ao que se refire o artigo 22 do Regulamento (UE) nº 1380/2013, demostrase equilibrio coas posibilidades de pesca, sempre que se reduza ou non aumente a potencia do motor, segundo se indica nos requisitos específicos para este tipo de axuda.

Ademais, serán subvencionables os custos dos informes preceptivos e obrigatorios necesarios para realizar o investimento, de ser o caso.

A axuda polo cambio de motor só se poderá conceder unha vez en todo o período de programación do FEMPA para o mesmo propietario e buque pesqueiro.

D. Investimentos que aumenten o valor engadido, a economía circular e a seguridade alimentaria:

a) Investimentos a bordo que incrementen o valor dos produtos da pesca, en particular permitindo que os pescadores/as melloren a capacidade de comercialización das súas capturas;

b) Investimentos a bordo que incrementen a seguridade alimentaria dos produtos da pesca, en particular aqueles relativos á prevención e loita contra o anisakis, etc.;

c) Investimentos ou operacións que teñan como obxectivo desenvolver ou introducir novos coñecementos técnicos ou organizativos a bordo que melloren o valor engadido e/ou a seguridade alimentaria dos produtos da pesca;

d) Investimentos a bordo para a valorización e xestión das capturas accidentais reguladas pola obriga de desembarque, as capturas non desexadas e os refugалlos xerados na actividade pesqueira;

e) Estudos e proxectos para a mellora do valor engadido e a seguridade alimentaria.

2. Non serán subvencionables:

– As operacións que incrementen a capacidade pesqueira do buque, salvo no caso das axudas que teñan por finalidade mellorar a seguridade, as condicións de traballo e a eficiencia enerxética, aumentando o arqueo bruto dun buque pesqueiro, conforme ao artigo 19 do RFEMPA.

– A adquisición de equipos que aumenten a capacidade do buque para detectar peixe.

– As construcións, adquisicións ou importacións de buques de pesca, salvo disposición en contra do artigo 17 do RFEMPA.

– A transferencia de buques de pesca a terceiros países ou o seu reabandeiramento con pavillón de terceiros países, incluso a través da creación de empresas conxuntas con socios de terceiros países.

– Os investimentos a bordo de buques pesqueiros que levaran a cabo actividades pesqueiras no mar durante menos de 60 días nos dous anos civís anteriores ao ano de presentación da solicitude.

– A pesca exploratoria.

– O Imposto do Valor Engadido (IVE) cando sexa recuperable.

– Outros impostos recuperables.

– As transferencias de propiedade dunha empresa.

– Non se financiarán nin a construción nin a adquisición de elementos, infraestruturas, artefactos, instalacións e equipamentos que non supoñan unha mellora substancial nos procesos de produción, na calidade dos produtos ou melloras para o ambiente.

– Os investimentos a bordo de buques pesqueiros necesarios para cumprir os requisitos do Dereito da Unión, estatal e autonómico en vigor no momento da presentación da solicitude de axudas.

– Os gastos de reposición de elementos, infraestruturas, instalacións e equipamentos, nin os gastos de mantemento das estruturas ou empresas, salvo que a nova adquisición supoña unha mellora substancial, ben pola tecnoloxía utilizada, polo seu rendemento, ou por unha mellora substancial nos procesos de produción ou na creación de emprego.

– As adquisicións de elementos, infraestruturas, instalacións e equipamentos de segundo uso e posteriores.

– A adquisición de elementos e todo tipo de bens que non sexan pagados por transferencias bancarias ou aqueles pagados mediante préstamos de entidades provedoras.

3. No seu caso, serán subvencionables os gastos dos proxectos técnicos, que non poderán superar o límite do 12% do investimento máximo subvencionable.

4. A elixibilidade das operacións basearase no documento “Criterios de selección para a concesión das axudas no marco do Programa nacional do FEMPA”, que a Autoridade de xestión do Fondo Europeo Marítimo, de Pesca e de Acuicultura someteu á aprobación do Comité de Seguimento.

5. Tamén será subvencionable o gasto derivado da elaboración da certificación ou informe de procedementos acordados dun auditor inscrito no Rexistro Oficial de Auditores de Contas (ROAC), no caso de subvencións de importe superior a 30.000,00 euros, cando non sexa posible presentar as contas de perdas e ganancias abreviadas.

Artigo 11. *Compatibilidade das axudas*

1. Os gastos cofinanciados por esta Orde serán compatibles con outras liñas de axudas, sempre que a suma de todas elas non supere o límite da intensidade máxima de axuda pública prevista no artigo 41 do Regulamento FEMPA.

2. Non obstante, a obtención concorrente de axudas outorgadas para a mesma finalidade polas administracións ou entes públicos ou privados, nacionais ou internacionais, cando o importe total das subvencións percibidas por cada persoa beneficiaria supere os límites que se indican no número anterior, dará lugar á redución proporcional que corresponda no importe das subvencións, ata axustarse a ese límite na última subvención que se conceda.

Artigo 12. *Certificación de non inicio*

1. Con carácter xeral, as actuacións para as que se solicita axuda non poderán estar iniciadas antes de que os servizos da Consellería do Mar acrediten, unha vez presentada a solicitude, o non inicio. No caso excepcional de que no momento da acreditación do non inicio o buque estea a faenar, deberase acreditar este feito e asinar unha declaración responsable segundo o Anexo II. Será condición indispensable para o pago da axuda a realización da citada acreditación con anterioridade ao comezo dos traballos correspondentes aos investimentos solicitados.

Para esta convocatoria poderanse admitir actas de non inicio realizadas con posterioridade ao 1 de xaneiro de 2021, a condición de que os investimentos non estean finalizados nin completamente pagados antes da presentación da súa solicitude de axuda para a presente convocatoria, o que deberá ser comprobado pola administración coa máxima colaboración do interesado, constituíndo un requisito indispensable para a validez da acta. O interesado deberá solicitar expresamente esta comprobación para dar validez á devandita acta.

2. Non precisarán da certificación á que fai referencia o apartado anterior:

Os investimentos que se refiren a instalacións de equipamentos que non requiran a autorización para a súa instalación, sempre que o investimento declarado polo interesado sexa igual ou inferior a 6.000 €.

Nestes supostos o non inicio das actuacións acreditarase mediante declaración responsable (Anexo II) de que os investimentos non foron iniciados.

No caso de que estas actuacións se refiran a investimentos que requiran obras, precisarán da acta de non inicio realizada polos servizos da Consellería do Mar.

3. No caso de proxectos técnicos, o non inicio acreditarase mediante a factura, que poderá ser de data de ata tres meses antes da presentación da solicitude, salvo no caso de non inicio anticipado, que terá que ser posterior á data de realización da devandita acta.

4. Para a realización das actas de non inicio poderanse realizar convocatorias colectivas fixando unha data, un lugar e unha hora para a súa realización. Esta convocatoria expoñerase nos taboleiros de anuncios dos departamentos territoriais da Consellería do Mar.

5. Para a realización das actas de non inicio o interesado deberá poñer os medios necesarios que faculten a dita inspección, asumindo os gastos que deriven dela. Tamén se aplicará isto para os controis que se deriven da letra c) do artigo 7, cando sexa necesario.

6. Non obstante o indicado no punto 2 deste artigo, para investimentos en buques e por causas xustificadas, poderase solicitar ao órgano competente que a certificación do non inicio sexa realizada por outros servizos:

- 6.1. No caso de que as obras se realicen noutra comunidade autónoma ou cando o buque estea noutra comunidade no momento de realización da acta, esta certificación poderá ser emitida polos servizos correspondentes desa comunidade autónoma.

- 6.2. Para obras que se realicen no estranxeiro ou se o buque está no estranxeiro, esta certificación poderá ser emitida por entidade ou organismo habilitado e debidamente acreditada, coa inescusable intervención das autoridades españolas correspondentes (embaixada, consulado ou outras con capacidade para realizala).

Sen prexuízo do establecido no punto anterior, o órgano competente poderá designar a persoa ou persoas para que se despracen ata onde estea o buque co fin de realizar a visita *in situ* e posterior certificación de non inicio; os gastos do devandito desprazamento serán por conta do solicitante da

axuda. Aplicarase isto tamén para os controis que deriven da letra c) do artigo 7, cando sexa necesario.

Non obstante, o órgano competente poderá determinar que a inspección *in situ* se realice no porto base do buque.

7. Se fose necesario iniciar as actuacións antes do inicio da data de presentación de solicitudes da convocatoria anual correspondente, de forma excepcional, poderase facer unha certificación de non inicio antes de que estas comecen, nos seguintes termos:

A solicitude dirixirase, en función do porto base da embarcación, ao departamento territorial correspondente da Consellería do Mar e achegaráselle ao proxecto, de ser o caso, memoria descritiva dos aspectos económicos e técnicos do investimento que inclúa a xustificación da excepcionalidade para acometer os investimentos, facturas proforma e/ou catálogos que permitan facer unha valoración dos investimentos que se van realizar e relación destes, planos e tres ofertas alternativas. As tres ofertas alternativas serán necesarias cando o importe do gasto unitario iguale ou supere a contía de 40.000 euros, no caso de execución de obras, ou de 15.000 euros, no caso de subministración de bens ou prestación de servizos. A elección entre as ofertas presentadas realizarase de conformidade con criterios de eficiencia e economía e a elección deberá xustificarse expresamente nunha memoria cando non recaia na proposta económica máis vantaxosa.

O departamento territorial correspondente tramitará a dita solicitude despois da conformidade da Dirección Xeral de Pesca, Acuicultura e Innovación Tecnolóxica.

Esta certificación de non inicio formará parte do expediente administrativo da solicitude posterior, quedando incluída no mesmo procedemento administrativo.

8. A realización da certificación de non inicio en ningún caso implica dereito nin mérito para a concesión da axuda.

9. A realización da certificación de non inicio poderá dar lugar ao pago das correspondentes taxas.

Artigo 13. *Prazo de presentación das solicitudes*

Para esta convocatoria de 2026 o prazo de presentación das solicitudes será dun mes contado a partir do día seguinte ao da publicación desta orde no *Diario Oficial de Galicia*. Entenderase como último día do prazo o correspondente ao mesmo ordinal do día da publicación. Se o último día de prazo fose inhábil, entenderase prorrogado ao primeiro día hábil seguinte e, se no mes de

vencemento non houbese día equivalente ao inicial do cómputo, entenderase que o prazo expira o último do mes.

Artigo 14. Forma de presentación de solicitudes

1. As solicitudes presentaranse obrigatoriamente por medios electrónicos a través do formulario normalizado dispoñible na sede electrónica da Xunta de Galicia, <https://sede.xunta.gal>.

Só se admitirá unha solicitude por barco en cada liña de axudas.

De conformidade co artigo 68.4 da Lei 39/2015, do 1 de outubro, do procedemento administrativo común das administracións públicas, se algunha das persoas interesadas presenta a súa solicitude presencialmente, requiriráselle para que a emende a través da súa presentación electrónica. Para estes efectos, considerarase como data de presentación da solicitude aquela na que fose realizada a emenda.

Para a presentación das solicitudes poderá empregarse calquera dos mecanismos de identificación e sinatura admitidos pola sede electrónica da Xunta de Galicia, incluído o sistema de usuario e clave Chave365 (<https://sede.xunta.gal/chave365>).

2. Para os efectos da presentación da solicitude, os interesados poderán actuar por medio de representante. A acreditación da representación deberá realizarse mediante a presentación da correspondente autorización e aceptación, utilizando o Anexo VIII da presente orde.

Artigo 15. Documentación complementaria

1. As persoas interesadas deberán achegar coa solicitude a seguinte documentación:

– Segundo o tipo de axuda que se solicite: anexo I.A de solicitude de axudas para investimentos dirixidos á diminución do efecto da pesca, código do procedemento (PE120A); anexo I.B de solicitude de axudas para investimentos que melloren as condicións laborais e de seguridade a bordo, código do procedemento (PE120B); anexo I.C de solicitude de axudas para investimentos destinados a aumentar a eficiencia enerxética e mitigación do cambio climático e/ou redución das emisións de CO₂, código do procedemento (PE120C); anexo I.E, de solicitude de axudas para investimentos que aumenten o valor engadido, a economía circular e a seguridade alimentaria, código do procedemento (PE120E).

– Anexo II da declaración responsable de non inicio do investimento, no seu caso.

– Segundo o tipo de axuda que se solicite anexo III relativo ao formulario de investimento: anexo III.A de axudas para investimentos dirixidos á diminución do efecto da pesca; anexo III.B de axudas para investimentos que melloren as condicións laborais e de seguridade a bordo; anexo III.C de

axudas para investimentos destinados a aumentar a eficiencia enerxética e mitigación do cambio climático e/ou redución das emisións de CO₂; anexo III.E de axudas para investimentos que aumenten o valor engadido, a economía circular e a seguridade alimentaria.

- Anexo IV, declaración de non ter resolución desfavorable a un proceso de regularización.
- Anexo V.1, de pluralidade de persoas solicitantes, se é o caso.
- Anexo V.2, de agrupacións ou entidades sen personalidade xurídica ou comunidades de bens, se é o caso.
- Anexo VIII, nomeamento de representante para os efectos de presentación da solicitude, se é o caso.
- Segundo o tipo de axuda, anexo de indicadores FEMPA que corresponda: anexo IX.A de axudas para investimentos dirixidas á diminución do efecto da pesca; anexo IX.B de axudas para investimentos que melloren as condicións laborais e de seguridade a bordo; anexo IX.C de axudas para investimentos en eficiencia enerxética e mitigación do cambio climático e/ou redución das emisións de CO₂ e anexo IX.E de axudas para investimentos que aumenten o valor engadido, a economía circular e a seguridade alimentaria.
- No caso de axudas para investimentos que melloren as condicións laborais e de seguridade a bordo (PE120B) e para investimentos que aumenten o valor engadido, a economía circular e a seguridade alimentaria (PE120E), Anexo X de declaración responsable da persoa solicitante da axuda con respecto á aplicación da normativa pertinente en materia de accesibilidade para as persoas con discapacidade.

2. A documentación complementaria está formada por:

- I) Se o solicitante é unha persoa física:
 - a) Declaración da renda da persoa solicitante dos exercicios 2023 e 2024 na que conste o seu envío telemático ou a súa presentación.
- II) Se o solicitante é unha persoa xurídica:
 - a) Certificación rexistral actualizada dos estatutos sociais e da escritura de constitución.
 - b) Poder suficiente do representante, no caso de que tal poder non figure nos estatutos.

c) Certificación actualizada do Rexistro Mercantil das contas anuais individuais depositadas do exercicio económico 2024, incluíndo informe de auditoría do exercicio 2024, se é o caso.

d) Certificación actualizada do Rexistro Mercantil, ou do rexistro que corresponda, das contas anuais consolidadas do exercicio 2024, tanto se foron depositadas pola persoa solicitante como aquelas contas nas que a persoa solicitante estea incluída, incluíndo o informe de auditoría do exercicio 2024, de ser o caso.

e) Certificado acreditativo de carecer de antecedentes penais obtido a través do Rexistro Central de Penados do Ministerio da Presidencia, Xustiza e Relacións coas Cortes, que deberá conter a totalidade de antecedentes penais non cancelados, para os efectos de verificar que non foi declarado culpable de cometer fraude no marco do FEMP ou FEMPA. Se da información anterior non se entende acreditada a ausencia de antecedentes penais, solicitarase ao interesado que achegue certificado que acredite a totalidade de antecedentes penais ou a ausencia deles.

III) Cando as pretensións correspondan a unha pluralidade de persoas, poderán ser formuladas nunha única solicitude, por medio de representante legalmente habilitado, e, na súa falta, do que figure en primeiro termo. Para os efectos do ingreso da subvención, a conta bancaria sinalada no Anexo I. A, Anexo I. B, Anexo I. C ou Anexo I. E deberá estar a nome unicamente de todas as persoas solicitantes:

a) Escritura de constitución da comunidade de bens, agrupacións ou entidades sen personalidade xurídica, se é o caso. En calquera caso, deberá nomearse un representante ou apoderado único da agrupación e especificar a porcentaxe de participación de cada un dos seus membros (anexo V.2).

b) No caso dunha comunidade de bens ou unha agrupación ou entidade sen personalidade xurídica que estea en réxime de atribución de rendas, deberán presentar o modelo 184 de declaración informativa de entidades en réxime de atribución de rendas, dos exercicios 2023 e 2024, no que conste o seu envío telemático ou a súa presentación.

c) Anexo V.1 de pluralidade de persoas solicitantes ou anexo V.2 de agrupacións ou entidades sen personalidade xurídica ou comunidade de bens.

d) Acordo de nomeamento de representante ou apoderado para os efectos da solicitude da axuda, asinado por todos.

e) No caso de comunidades de bens, agrupacións ou entidades sen personalidade xurídica: certificado acreditativo de carecer de antecedentes penais desta entidade, obtido a través do Rexistro Central de Penados do Ministerio da Presidencia, Xustiza e Relacións coas Cortes, que deberá conter a totalidade de antecedentes penais non cancelados, para os efectos de verificar que

non foi declarada culpable de cometer fraude no marco do FEMP ou FEMPA. Se da información anterior non se entendese acreditada a ausencia de antecedentes penais, solicitarase ao interesado que achegue certificado que acredite a totalidade de antecedentes penais ou a ausencia deles.

f) Declaración da renda dos exercicios 2023 e 2024 de cada persoa solicitante, na que conste o seu envío telemático ou a súa presentación.

Outra documentación complementaria:

IV) As liquidacións trimestrais ou mensuais do IVE dispoñibles do exercicio 2025, nas que conste o seu envío telemático ou a súa presentación por parte de cada persoa solicitante, se é o caso.

V) Certificado actualizado da declaración censual de alta en obrigas tributarias, de cada persoa solicitante.

VI) Cando o importe do gasto unitario iguale ou supere a contía de 40.000 euros, no caso de execución de obras, ou de 15.000 euros, no caso de subministración de bens ou prestación de servizos, a persoa beneficiaria deberá achegar, como mínimo, tres ofertas de diferentes provedores. A elección entre as ofertas presentadas realizarase de conformidade con criterios de eficiencia e economía e a elección deberá xustificarse expresamente nunha memoria cando non recaia na proposta económica máis vantaxosa.

VII) Facturas proforma dos investimentos para os que se solicita subvención, con descrición detallada e pormenorizada de cada un dos investimentos, instalacións, equipos e sistemas que os integran, achegando, no seu caso, os planos, esbozos ou vistas 3D necesarios para a súa correcta definición e, se é o caso, certificado de importación.

VIII) Certificación actualizada do Rexistro de Bens Mobles, sección de Buques, acreditativa da propiedade do buque e o estado de cargas ou gravames deste.

IX) Folla de asento actualizada (expedida nos 3 meses anteriores contados desde a data de publicación desta orde).

X) Seguro que garanta a cobertura de danos a terceiros.

XI) Se a realización do investimento require proxecto técnico ou planos, deberá achegarse e estar asinado por técnico competente e conterá os planos de antes e despois da realización do investimento que se solicita, se fose preciso.

XII) Se a axuda é para investimentos dirixidos á diminución do efecto da pesca (PE120A): informe realizado por técnicos ou expertos independentes con competencias para a súa emisión, que

demostre que os investimentos que reciben apoio teñen a capacidade de conseguir maior selectividade da arte de pesca, ou menor impacto, segundo o caso, respecto doutros equipos estándar en virtude da normativa da Unión.

XIII) Se a axuda é para investimentos que melloren as condicións laborais e de seguridade a bordo (PE120B) sen aumento de capacidade, para os investimentos que se relacionan nas letras da w á aa do artigo 10.1.B no apartado de seguridade: informe técnico que xustifique a actuación coa mellora da seguridade a bordo e que xustifique o non aumento de capacidade nin de habilidade para detectar peixe.

Se a axuda é para investimentos que melloren as condicións laborais e de seguridade a bordo (PE120B) con aumento de capacidade: GTs adicionais que se utilizarán na obra indicando o buque de procedencia de ditos GTs.

XIV) Se as axudas son para mellorar a eficiencia enerxética e mitigar o cambio climático e/ou reducir as emisións de CO₂ (PE120C)con aumento de capacidade: informe/auditoría enerxética de aforro de combustible por técnico especialista e GTs adicionais que se utilizarán na obra indicando o buque de procedencia de ditos GTs.

XV) Se a axuda é para mellorar a eficiencia enerxética e mitigar o cambio climático e/ou reducir as emisións de CO₂ (PE120C) sen aumento de capacidade:

- i- informe/auditoría enerxética de aforro de combustible emitido por un técnico especialista independente con competencia para a súa emisión, cando o investimento consista en estabilizadores ou quillas de balance ou flaps nas operacións que teñan como obxectivo mellorar a hidrodinámica do casco.
- ii- informe técnico que indique que a operación non incrementa a capacidade do buque, no caso das operacións que teñan como finalidade mellorar o sistema de propulsión dos buques.
- iii- auditoría enerxética de aforro de combustible emitida por un técnico ou experto independente con competencia para a súa emisión, no caso de novas toberas para mellorar o sistema de propulsión.
- iv- informe enerxético de aforro de combustible por un técnico ou experto independente con competencia para a súa emisión, no caso de modificación ou cambios de portas.

v- informe de técnico ou experto independente, con competencia para a súa emisión, de que non se pon en perigo a selectividade desa arte de pesca, para as operacións que teñan por obxecto as artes de pesca, aparellos e utensilios de pesca.

vi- informe/auditoría enerxética de aforro de combustible realizado por un técnico ou experto independente con competencia para a súa emisión, para as operacións que teñan por obxecto as artes de pesca, aparellos e utensilios de pesca.

XVI) Se a axuda é para mellorar a eficiencia enerxética e mitigar o cambio climático e/ou reducir as emisións de CO₂ (PE120C) cambio de motor, deberán presentar, segundo corresponda:

i- Acreditación do fabricante do motor da redución do 20% en emisións de CO₂ ou unha redución na utilización de combustible do 20%.

ii- Acreditación do fabricante do motor das características técnicas do novo motor.

iii- Acreditación de que o novo motor utiliza un tipo de combustible ou un sistema de propulsión do que se considera emite menos CO₂ que o motor substituído. Ademais, estas medicións poderán ter en conta a norma ISO 8178.

XVII) Informe de riscos actualizado expedido pola Central de Información de Riscos do Banco de España, asinado electronicamente ou debidamente asinado e selado.

XVIII) Plan de financiamento do proxecto:

a) Informe no que se indique a forma na que se vai a financiar o proxecto, especificando o importe que se financiará con recursos propios, alleos ou con ámbolos tipos de financiamento. Deberase especificar se se financia a través de conta corrente, de aforro, prazos, ampliación de capital, préstamo bancario, póliza de crédito, préstamo formalizado con socios, ou outro tipo de financiamento, indicándose tamén a entidade bancaria e o importe destinado a financiar o proxecto.

b) Documentación xustificativa do tipo de financiamento:

Recursos propios:

– Certificados bancarios actualizados, debidamente asinados e selados ou asinados electronicamente, das contas da persoa solicitante onde conste a titularidade, o tipo de conta (corrente, aforro, a prazos, etc.; as contas de crédito considéranse recursos alleos) e os fondos dispoñibles para realizar o investimento. No caso de que o tipo de conta non sexa unha conta

corrente ou conta de aforro, deberá indicar a súa dispoñibilidade, ou, no caso contrario, o prazo de vencemento.

Non se admitirá a dispoñibilidade de fondos propios en contas bancarias nas que figure como titular algunha persoa que non teña a condición de solicitante.

– Ampliación de capital: escritura notarial de ampliación de capital en diñeiro, a súa correspondente inscrición no Rexistro Mercantil e o/os certificado/s bancario/s do/os desembolso/s deste/s.

Recursos alleos:

– Préstamos formalizados con entidades de crédito: póliza de préstamo vixente debidamente intervida ante notario.

– Pólizas de crédito formalizadas con entidades de crédito: póliza de crédito vixente (última renovación), debidamente intervida por notario, e certificado bancario actualizado debidamente asinado e selado ou asinados electronicamente, onde identifique o número da póliza de crédito á que fai referencia, o límite da póliza, o importe dispoñible e disposto.

– Préstamos formalizados con socios: contrato de préstamo entre socios, debidamente asinado por prestamista e prestameiro, certificado/s bancario/s do/os desembolso/s daquel, e a liquidación definitiva do imposto correspondente no organismo competente, se é o caso.

Non se admitirán os recursos alleos nos que figure como titular algunha persoa que non teña a condición de solicitante; tampouco se admitirán préstamos de entidades proveedoras.

Noutros casos, achegarase a documentación financeira correspondente.

XIX) Para subvencións de importe superior a 30.000 euros, as persoas xurídicas, distintas das entidades de dereito público, con ánimo de lucro, suxeitas á Lei 3/2004, do 29 de decembro, pola que se establecen medidas de loita contra a morosidade nas operacións comerciais, que de acordo coa normativa contable non poden presentar conta de perdas e ganancias abreviada, co fin de comprobar o requisito establecido no artigo 5.16) da presente Orde, deberán presentar:

- Certificación emitida por auditor rexistrado no Rexistro Oficial de Auditores de Contas.

- Informe de procedementos acordados, elaborado por un auditor rexistrado no Rexistro Oficial de Auditores de Contas.

XX) Factura da certificación ou do informe de procedementos acordados do auditor mencionado no punto anterior. Se o gasto unitario da factura iguala ou supera os 15.000 €, deberá achegar, como mínimo, dúas ofertas máis de diferentes provedores. A elección realizarase de conformidade con criterios de eficiencia e economía e a elección deberá xustificarse expresamente nunha memoria cando non recaia na proposta económica máis vantaxosa.

XXI) Certificación bancaria acreditativa do pagamento correspondente á mencionada factura. O certificado bancario indicará a factura que soporta. O pagamento terase que realizar obrigatoriamente mediante transferencia bancaria.

De conformidade co artigo 28.3 da Lei 39/2015, do 1 de outubro, do procedemento administrativo común das administracións públicas, non será necesario achegar os documentos que xa foran presentados anteriormente pola persoa interesada ante calquera administración. Neste caso, a persoa interesada deberá indicar en que momento e ante que órgano administrativo presentou os ditos documentos, que serán recabados electronicamente a través das redes corporativas ou mediante consulta ás plataformas de intermediación de datos ou outros sistemas electrónicos habilitados ao efecto, agás que conste no procedemento a oposición expresa da persoa interesada.

De forma excepcional, se non se puideran obter os citados documentos, poderá solicitarse novamente á persoa interesada a súa achega.

3. A documentación complementaria deberá presentarse electronicamente.

Se algunha das persoas interesadas presenta a documentación complementaria presencialmente, requiriráselle para que a emende a través da súa presentación electrónica. Para estes efectos, considerarase como data de presentación aquela na que fose realizada a emenda.

As persoas interesadas responsabilizaranse da veracidade dos documentos que presenten. Excepcionalmente, cando a relevancia do documento no procedemento o esixa ou existan dúbidas derivadas da calidade da copia, a administración poderá solicitar, de maneira motivada, o cotexo das copias achegadas pola persoa interesada, para o que poderán requirir a exhibición do documento ou da información orixinal.

4. Sempre que se realice a presentación de documentos separadamente da solicitude, deberase indicar o código e o órgano responsable do procedemento, o número de rexistro de entrada da solicitude e o número de expediente, se se dispón del.

5. No caso de que algún dos documentos a presentar de forma electrónica superase os tamaños máximos establecidos ou tivera un formato non admitido pola sede electrónica da Xunta de Galicia,

permitirase a presentación deste de forma presencial dentro dos prazos previstos e na forma indicada no número anterior. A información actualizada sobre o tamaño máximo e os formatos admitidos pode consultarse na sede electrónica da Xunta de Galicia.

Artigo 16. Comprobación de datos.

1. Para a tramitación destes procedementos consultarase automaticamente os datos incluídos nos seguintes documentos en poder da administración actuante ou elaborados polas administracións públicas, agás que a persoa interesada se opoña á súa consulta:

a) DNI/NIE da persoa física solicitante. Cando as pretensións correspondan a unha pluralidade de persoas físicas, DNI/NIE de todas elas.

b) DNI/NIE da persoa representante ou NIF da entidade representante, nomeada para os efectos da presentación da solicitude.

c) DNI/NIE da persoa representante legal da persoa xurídica.

d) NIF da entidade solicitante ou agrupación sen personalidade xurídica ou da comunidade de bens, segundo corresponda.

e) Certificación de que cada persoa solicitante estea ao corrente no cumprimento das súas obrigas coa Axencia Estatal da Administración Tributaria.

f) Certificación de que cada persoa solicitante está ao corrente no cumprimento das súas obrigas coa Tesourería Xeral da Seguridade Social.

g) Certificación de que cada persoa solicitante está ao corrente no cumprimento das súas obrigas coa Facenda da Xunta de Galicia.

h) Consulta de que cada persoa solicitante está ao corrente no pagamento de obrigas por reintegro de subvencións obtida da Consellería de Facenda e Administración Pública (Atriga).

i) Informe acreditativo de que non ten cometido infraccións graves consonte o artigo 42 do Regulamento (CE) n.º 1005/2008 do Consello, o artigo 90 do Regulamento (CE) n.º 1224/2009, ou consonte a outros actos legislativos adoptados polo Parlamento Europeo e polo Consello, no marco de la PPC, emitidos pola unidade administrativa correspondente da Consellería do Mar.

j) Consulta de non estar en concurso de acredores (artigo 10 da Lei 9/2007, do 13 de xuño, de subvencións de Galicia), obtida a través do Rexistro Público Concursal.

k) Informe acreditativo de non ter cometido infraccións graves consonte o artigo 42 do Regulamento (CE) n.º 1005/2008 do Consello, o artigo 90 do Regulamento (CE) n.º 1224/2009, ou consonte a outros actos legislativos adoptados polo Parlamento Europeo e polo Consello, no marco de la PPC, emitido polo Ministerio de Agricultura, Pesca e Alimentación.

l) Certificado acreditativo de carecer de antecedentes penais, no caso de persoas físicas ou de pluralidade de persoas. No caso de que o solicitante sexa unha agrupación ou entidade sen personalidade xurídica ou comunidade de bens, certificado de carecer de antecedentes penais dos seus integrantes. Os certificados deberán ser obtidos a través do Rexistro Central de Penados do Ministerio da Presidencia, Xustiza e Relacións coas Cortes, e deberán conter a totalidade de antecedentes penais non cancelados, para os efectos de verificar que non foi declarado culpable de cometer fraude no marco do FEMP ou FEMPA. Se da información anterior non se entendese acreditada a ausencia de antecedentes penais, solicitarase ao interesado que achegue o certificado que acredite a totalidade de antecedentes penais ou a ausencia deles.

m) Consulta no Sistema nacional de publicación de subvencións do Ministerio de Facenda e Función Pública de non ter sido declarado culpable de cometer fraude, no marco do FEMP ou FEMPA.

n) Consulta de que cada persoa solicitante e integrante da agrupación ou entidade sen personalidade xurídica ou comunidade de bens, se é o caso, non estea ou estivera involucrada nos últimos 24 meses na explotación, xestión ou propiedade dalgún buque pesqueiro incluído na lista de buques INDNR da Unión Europea segundo dispón o artigo 40, apartado 3, do Regulamento (CE) n.º 1005/2008, polo que se establece un sistema comunitario para previr, desalentar e eliminar a pesca ilegal, non declarada e non regulamentada, ou dalgún buque que estea ou estivera nos últimos 12 meses enarborando o pavillón de países considerados terceiros países non cooperantes segundo se establece no artigo 33 do citado regulamento.

ñ) Autorización da Consellería do Mar, ou solicitude desta autorización, para a realización do investimento previsto, no caso de que esta sexa necesaria.

o) Consulta de concesión de subvencións e axudas.

p) Consulta de inhabilitación para obter subvencións e axudas.

2. No caso de que as persoas interesadas se opoñan á consulta, deberán indicalo no cadro correspondente habilitado no formulario correspondente e achegar os documentos.

Cando así o esixa a normativa aplicable solicitarase o consentimento expreso da persoa interesada para realizar a consulta.

3. Os consentimentos esténdense desde a data de solicitude e ata os 5 anos posteriores ao pagamento final, para verificar o cumprimento de non atoparse en ningún dos supostos establecidos no punto 1, letras a), b), e no punto 3 do artigo 11 do RFEMPA.

4. Excepcionalmente, no caso de que algunha circunstancia imposibilite a obtención dos citados datos, poderase solicitar ás persoas interesadas a presentación dos documentos correspondentes.

Artigo 17. Trámites administrativos posteriores á presentación da solicitude

Todos os trámites administrativos que as persoas interesadas deban realizar trala presentación da solicitude deberán ser efectuados electronicamente accedendo á Carpeta cidadá da persoa interesada, dispoñible na sede electrónica da Xunta de Galicia.

Artigo 18. *Tramitación de solicitudes*

A tramitación das solicitudes realizarase por fases; no caso de que unha solicitude non supere unha das fases, implicará que a súa tramitación finalizará sen que poida pasar á fase seguinte; neste caso, o órgano competente emitirá a correspondente resolución.

A) Fase de admisión de solicitudes.

1. Inicio do expediente.

a) No caso de axudas para mellorar as condicións laborais e de seguridade a bordo sen aumento de capacidade, os servizos de Pesca, Acuicultura e Innovación Tecnolóxica dos departamentos territoriais da Consellería do Mar analizarán os expedientes e requirirán a emenda da documentación necesaria, no seu caso.

b) No resto das axudas o Servizo de Innovación Tecnolóxica da Frota da Consellería do Mar, nos servizos centrais, analizará os expedientes e requirirá a documentación necesaria, no seu caso.

2. Se a solicitude non reúne algún dos requisitos esixidos nestas bases reguladoras ou na correspondente convocatoria, requirirase ao interesado para que, nun prazo de dez días hábiles, emende a deficiencia ou remita os documentos preceptivos imprescindibles recollidos no artigo 15.

Neste requirimento farase indicación expresa de que, se así non o fixese, darase por desistido da súa solicitude.

Este requirimento de emenda tamén se fará se das certificacións obtidas de conformidade co artigo 5, punto 15, resulta que o solicitante non está ao corrente no pagamento das súas obrigas tributarias co Estado, coa Comunidade Autónoma de Galicia e coa Seguridade Social.

A documentación requirida para a emenda da solicitude deberá ser presentada na forma que se determina nos artigos 14 e 16.4 da Lei 39/2015, do 1 de outubro, do procedemento administrativo común das administracións públicas.

3. Sen prexuízo do sinalado no número anterior, poderá requirirse ao solicitante para que achegue cuantos datos, documentos complementarios e aclaracións resulten necesarios para a tramitación e resolución do procedemento.

4. Finalizado o prazo de presentación de solicitudes, o solicitante non poderá modificar a súa solicitude de axuda aumentando o importe total do investimento nin incluíndo novos conceptos para os cales solicita a axuda.

Non se considerarán aumento do importe total do investimento as diferenzas ou erros materiais que se poidan dar ao transcribir nos anexos o importe das facturas proforma.

5. Os expedientes iniciados nos departamentos territoriais remitiranse, xunto cun informe ao respecto, ao Servizo de Innovación Tecnolóxica da Frota, que continuará coa tramitación segundo o establecido neste artigo. Igualmente, os expedientes iniciados no Servizo de Innovación Tecnolóxica da Frota continuarán coa devandita tramitación.

6. Sempre que se teñan en conta para a resolución das axudas aspectos distintos aos aducidos polos interesados, daráselles a estes un trámite de audiencia con carácter previo á avaliación dos expedientes pola comisión de selección.

7. Para os expedientes que non cumpran as esixencias contidas nestas bases ou na normativa de aplicación, ou que non conteñan a documentación necesaria, o órgano instrutor emitirá un informe desfavorable previo á proposta de resolución de non admisión ou de desistencia, segundo sexa o caso, no que se indicarán as causas que a motivan.

B) Fase de avaliación das solicitudes.

Para a avaliación das solicitudes utilizaranse catro categorías de criterios de selección: xerais; horizontais, ambientais e sociais; específicos de viabilidade técnica e/ou económicos; e, por último, específicos do tipo de actividade:

CRITERIOS	PESO
Xerais	30%
Horizontais ambientais e sociais	20%
Específicos de viabilidade técnica e/ou económicos	20%
Específicos do tipo de actividade	30%

Para calcular a puntuación final dunha operación utilizarase a seguinte fórmula:

Puntuación final

$$\begin{aligned}
 & \left(\frac{\text{Puntuación obtida en criterios xerais}}{\text{Puntuación máxima posible criterios xerais (10)}} \right) \times 30 \\
 & + \left(\frac{\text{Puntuación obtida en criterios horizontais ambientais e sociais}}{\text{Puntuación máxima posible criterios horizontais ambientais e sociais (4)}} \right) \times 20 \\
 & + \left(\frac{\text{Puntuación obtida en criterios técnicos e/ou económicos}}{\text{Puntuación máxima posible criterios técnicos e/ou económicos (10)}} \right) \times 20 \\
 & + \left(\frac{\text{Puntuación obtida en criterios específicos do tipo de actividade}}{\text{Puntuación máxima posible criterios específicos (10)}} \right) \times 30
 \end{aligned}$$

I. Criterios xerais de valoración (0-10 puntos)

Os criterios xerais teñen por obxecto asegurar que as operacións elixibles vaian dirixidas a alcanzar os obxectivos definidos no Programa Operativo do FEMPA. Estes criterios puntuaranse da seguinte maneira:

I.1. Contribución á Estratexia, DAFO e tipos de actividade do programa (0-6 puntos):

O valor para que unha operación sexa financiable debe acadar un mínimo de 3 puntos e un máximo de 6. Cada solicitude debe obter como mínimo 1 punto en cada un dos subcriterios seguintes:

I.1.1) Adecuación á Estratexia (0- 2 puntos):

- a) Comprobarase se a actuación está prevista na Estratexia e se é unha operación da "lista de operacións de importancia estratéxica" (1 punto)
- b) No caso de recollerse expresamente na Estratexia ou ser unha actuación do PNDB (Programa Nacional de datos básicos do sector pesqueiro), outorgarase a máxima puntuación (2 puntos)

I.1.2) Contribución á DAFO (0-2 puntos):

- a) Revisarase se a operación achega, contribúe ou recolle algún dos aspectos do DAFO (1 punto)

b) No caso de que se mencione de forma expresa a unha necesidade do DAFO, poderá outorgarse a máxima puntuación (2 puntos)

I.1.3) Adecuación ao tipo de actividade (0- 2 puntos):

a) Comprobarase que a actuación estea recollida no tipo de actividade do Programa operativo (1 punto)

b) No caso de que a actividade sexa nomeada expresamente poderá outorgarse a puntuación máxima (2 puntos)

I.2. Contribución aos indicadores de resultado (0- 2 puntos):

a) Contribución aos indicadores de resultado específicos. Outorgarase 1 punto se contribúe a todos os indicadores de resultado da súa actividade; no caso de non responder a todos, darase unha puntuación proporcional.

b) Contribución aos indicadores de resultado de obxectivo específico. Se contribúe outorgarase 1 punto.

c) Se a actividade está enmarcada dentro do PNDB outorgarase unha puntuación máxima de 2 puntos, ao ser unha actividade de importancia estratéxica no Programa FEMPA.

I.3. Contribución a plans ou programas (0-2 puntos):

Para que unha operación se poida financiar, a puntuación mínima que deberá obter será de 1 punto.

Avaliarase o grado de adecuación da operación a plans, políticas ou compromisos nacionais ou internacionais e a aqueles plans ou programas autonómicos, rexionais e/ou locais relacionados.

O valor 0 aplicarase cando as operacións non teñan correlación cun plan ou programa.

O valor 1 aplicarase cando as operacións teñan correlación cun plan ou programa.

O valor 2 aplicarase cando as operacións teñan correlación con máis dun plan ou programa.

Poderá outorgarse unha puntuación de 2 cando contribúa a un plan ou programa de ámbito social.

I.4. Unha vez valorados os criterios xerais, a puntuación máxima será de 10 puntos e a mínima superior a 4, e suporá o 30% da puntuación final. A aplicación dos criterios xerais de valoración permitirá determinar se a operación é apta ou non apta para ser cofinanciada polo FEMPA. Será non apta se obtén unha puntuación igual ou menor a 4.

O órgano instrutor emitirá un informe para as solicitudes que alcanzasen esta fase, no que se cualificará a operación como APTA ou NON APTA. Os proxectos que sexan cualificados como non aptos entenderanse non viables para a obtención dos fondos públicos.

II. Criterios horizontais: ambientais e sociais (0 a 4 puntos)

II.1. Aspectos ambientais (0-2 puntos):

- Relación coas Estratexias Mariñas e contribución ao bo estado ambiental dos ecosistemas acuáticos
- Relación coa redución de capturas accidentais e mellora da selectividade no sector pesqueiro (Plan Nacional para a Redución das Capturas Accidentais na Actividade Pesqueira, etc.).
- Eficiencia enerxética e efectos positivos na mitigación do cambio climático e a neutralidade climática.
- Operacións que promovan a redución de residuos, vertidos ou emisións contaminantes ou ocupación do chan, ou reduzan doutras formas o impacto ou a pegada ambiental do sector ou actividade obxecto da axuda.
- Medidas que promovan unha maior eficiencia do uso de recursos naturais, consumo de auga (plans de mellora de xestión e calidade do abastecemento de auga), o valor engadido e a economía circular.
- Medidas de implantación de sistemas de xestión ambiental baseados na normativa ISO, EMA ou similares.

Se a actuación está expresamente mencionada nalgún dos plans, normas ou estratexias indicadas nos criterios ambientais, asignaráselle 2 puntos; se, sen estar expresamente mencionada, contribúe polo menos a un dos criterios, asignarase o valor de 1 punto, e se non contribúe a ningún criterio o valor será de 0 puntos.

II.2. Aspectos sociais (0-2 puntos):

- Implicación do proxecto con outras actividades da zona.
- Actuacións ou medidas concretas en materia de accesibilidade.
- Participación e/ou dirixidos a mulleres

No caso de que a actuación non contribúa a ningún criterio, asignarase o valor de 0; se contribúe polo menos a un criterio, o valor será 1 punto e se contribúe a dous ou máis, o valor será de 2 puntos.

III. Criterios específicos de viabilidade técnica e/ou económicos (0-10 puntos)

- Financiamento propio do proxecto (FPP) de acordo coa seguinte fórmula:
 - O financiamento con fondos propios é igual ou superior ao 40 %: 10 puntos;
 - O financiamento propio está entre o 15 % e menos do 40%: 5 puntos;
 - O financiamento propio está entre o 1 % e menos do 15%: 2 puntos;
 - O financiamento propio é inferior ao 1 %: 1 punto.

$$\text{FPP} = \frac{\text{Recursos propios achegados}}{\text{Investimento total}} \quad \%$$

IV. Criterios específicos do tipo de actividade (0-10 puntos)

Para esta convocatoria e por tipo de actividade, estes criterios serán os que se relacionan a continuación:

A) Para axudas dirixidas á diminución do efecto da pesca

- Alcance do proxecto en función do GT (arqueo bruto) da embarcación:
 - Máis de 500 GTs: 1 puntos
 - Entre 500 e 250 GTs: 2 puntos
 - De 249 ata 100 GTs: 3 puntos
 - De 99 ata 30 GTs: 4 puntos
 - Menos de 30 GTs : 5 puntos
- Natureza do investimento:
 - Investimentos en equipamentos que diminúan a capacidade de pesca e/ou aumenten a selectividade por tamaños ou especies das artes de pesca: 5 puntos
 - Investimentos en equipos ou medidas técnicas que minimicen o risco de capturas accidentais de grandes organismos mariños: 4 puntos
 - Investimentos que eliminen os descartes evitando e reducindo as capturas non desexadas de poboacións comerciais ou para tratar as capturas non desexadas que deban desembarcarse de acordo co artigo 15 do Regulamento (UE) nº 1380/2013: 3 puntos

- Equipos que limiten e/ou eliminen os efectos físicos e biolóxicos das actividades pesqueiras no ecosistema, con outros seres vivos ou no fondo mariño: 2 puntos.
- Equipos para protexer as artes de pesca e as capturas fronte aos mamíferos e as aves protexidas pola Directiva 92/43/CEE ou pola Directiva 2009/147/CE do Parlamento Europeo e do Consello, a condición de que non se limite a selectividade das artes de pesca e se apliquen todas as medidas idóneas para evitar o dano físico aos predadores: 1 punto.

En caso de empate, priorizaranse os proxectos solicitados por mulleres e polas persoas de menor idade, por esa orde.

B) Para axudas que melloren as condicións laborais e de seguridade a bordo

B.1- Sen aumento de capacidade:

– N° de buques que teña o segmento de frota ao que pertenza o buque obxecto do investimento con porto base en Galicia:

- Ata 10 buques: 1 punto
- De 11 ata 50 buques: 2 puntos
- De 51 ata 100 buques: 3 puntos
- De 101 ata 200 buques: 4 puntos
- Máis de 200 buques: 5 puntos

– Actuacións relacionadas coa pesca costeira artesanal: 5 puntos

En caso de empate, terán prioridade os proxectos que melloren a seguridade, seguido dos que melloren as condicións laborais, despois os que melloren a saúde e, finalmente, os que melloren a hixiene. De persistir o empate, os proxectos solicitados por mulleres e polas persoas de menor idade, por esa orde.

B.2- Con aumento de capacidade:

–N° de buques que teña o segmento de frota ao que pertenza o buque obxecto do investimento con porto base en Galicia:

- Ata 10 buques: 1 punto
- De 11 ata 50 buques: 2 puntos
- De 51 ata 100 buques: 3 puntos
- De 101 ata 200 buques: 4 puntos

- Máis de 200 buques: 5 puntos

- Actuacións ou medidas concretas en materia de igualdade: 5 puntos

En caso de empate, terán prioridade os que melloren a seguridade, seguido dos que melloren as condicións laborais. De persistir o empate, priorizaranse os proxectos solicitados por mulleres e polas persoas de menor idade, por esa orde.

C) Para axudas destinadas a aumentar a eficiencia enerxética e mitigación do cambio climático e/ou redución das emisións de CO₂

C.1- Eficiencia enerxética sen aumento de capacidade

- Alcance do proxecto, en función dos GTs da embarcación:

- Máis de 500 GTs: 1 punto

- Entre 500 e 250 GTs: 2 puntos

- De 249 ata 100 GTs: 3 puntos

- De 99 ata 30 GTs: 4 puntos

- Menos de 30 GTs : 5 puntos

- Natureza do investimento:

- Investimentos relacionados coa mellora do sistema de propulsión do buque: 5 puntos

- Investimentos relacionados coa hidrodinámica do casco: 4 puntos

- Estudo para avaliar a contribución dos sistemas alternativos e do deseño do casco respecto da eficiencia enerxética do buque: 4 puntos

- Auditorías, programas e estudos piloto de eficiencia enerxética: 5 puntos

- Investimentos destinados a reducir o consumo de electricidade ou enerxía térmica: 3 puntos

No caso de empate priorizaranse as actuacións relacionadas coa pesca costeira artesanal e de persistir o empate terán prioridade os proxectos solicitados por mulleres e polas persoas de menor idade, por esa orde.

C.2- Eficiencia enerxética con aumento de capacidade

- Alcance do proxecto, en función dos GTs da embarcación:
 - Máis de 500 GTs: 1 punto
 - Entre 500 e 250 GTs: 2 puntos
 - De 249 ata 100 GTs: 3 puntos
 - De 99 ata 30 GTs: 4 puntos
 - Menos de 30 GTs : 5 puntos
- Alcance do proxecto en función da porcentaxe de GT incrementada:
 - Incremento de menos do 15%: 5 puntos
 - Incremento entre o 15% e menos de 30%: 3 puntos
 - Incremento do 30% ou máis: 1 punto

En caso de empate, priorizaranse os proxectos solicitados por mulleres e polas persoas de menor idade, por esa orde.

C.3- Cambio de motor

- Actuacións relacionadas coa pesca costeira artesanal: 5 puntos
- Efectos positivos na mitigación do cambio climático, segundo a porcentaxe de redución de emisións:
 - Se a redución é superior ao 50%: 5 puntos.
 - Se a redución está entre o 20% e menos de 50%: 3 puntos.
 - Se a redución é inferior ao 20%: 1 punto.

En caso de empate terá prioridade o que reduza máis potencia, expresada en quilovatios e de persistir o empate priorizaranse os proxectos solicitados por mulleres e polas persoas de menor idade, por esa orde.

- D) Para axudas que aumenten o valor engadido, a economía circular e a seguridade alimentaria:
 - Natureza do investimento:

- Investimentos a bordo que incrementen o valor dos produtos da pesca, en particular permitindo que os pescadores/as melloren a capacidade de comercialización das súas capturas: 2 puntos.
 - Investimentos a bordo que incrementen a seguridade alimentaria dos produtos da pesca, en particular aqueles relativos á prevención e loita contra o anisakis, etc.: 2 puntos.
 - Investimentos ou operacións que teñan como obxectivo desenvolver ou introducir novos coñecementos técnicos ou organizativos a bordo que melloren o valor engadido e/ou a seguridade alimentaria dos produtos da pesca: 5 puntos.
 - Investimentos a bordo para a valorización e xestión das capturas accidentais reguladas pola obriga de desembarque, as capturas non desexadas e os refugалlos xerados na actividade pesqueira: 4 puntos.
 - Estudos e proxectos para a mellora do valor engadido e a seguridade alimentaria: 3 puntos.
- Investimento en activos produtivos do proxecto segundo a seguinte fórmula:
- Igual ou superior a 10%: 5 puntos
 - Entre 5% e inferior a 10 %: 3 puntos
 - Inferior a 5%: 1 punto.

$$\text{Investimento en activos produtivos} = \frac{\text{Investimentos activos produtivos}}{\text{Investimentos totais en inmovilizado}} \quad \%$$

En caso de empate terán preferencia os proxectos solicitados por mulleres e polas persoas de menor idade, por esa orde.

C) Fase de selección.

1. Unha vez finalizada a fase anterior, a comisión de selección procederá a formular a proposta de resolución de concesión das axudas.
2. Na proposta que formule a comisión de selección figurarán de maneira individualizada os solicitantes propostos para obter a subvención, e indicarse a avaliación que lles corresponde segundo os criterios fixados nesta Orde. Ordenaranse os expedientes seleccionados de acordo coa puntuación obtida ata esgotar as dispoñibilidades orzamentarias. Así mesmo, indicarse a proposta do importe da subvención para cada un deles.
3. A comisión de selección, no seu caso, establecerá unha lista de reserva con aquelas solicitudes que, reunindo os requisitos establecidos na orde de convocatoria, non consigan a puntuación

necesaria para seren seleccionadas por falta de crédito. Nesta lista de reserva indicaranse os expedientes seleccionados ordenadamente de acordo coa puntuación obtida.

4. No caso de que a suma dos investimentos subvencionados dos expedientes propostos non supere o crédito existente para as axudas, non será necesario que figure a avaliación individualizada de cada expediente.
5. O presidente da comisión de avaliación elevará proposta de resolución ao órgano concedente, que ditará as correspondentes resolucións de concesión.

Artigo 19. *Comisión de selección*

1. Os expedientes serán avaliados por unha comisión de selección constituída na Dirección Xeral de Pesca, Acuicultura e Innovación Tecnolóxica.
2. A composición da comisión avaliadora estará formada polos seguintes membros:
 - a) Presidencia: subdirector/a xeral de Competitividade da Cadea Mar-Industria.
 - b) Vogais: dous funcionarios adscritos á Dirección Xeral de Pesca, Acuicultura e Innovación Tecnolóxica, designados polo presidente, e a Xefatura do Servizo de Innovación Tecnolóxica da Frota, que exercerá como secretaria. Ademais, para as axudas de mellora das condicións laborais e de seguridade a bordo sen aumento de capacidade (procedemento PE120B, sen aumento de capacidade) serán tamén vogais as persoas titulares das Xefaturas do Servizo de Pesca, Acuicultura e Innovación Tecnolóxica da Consellería do Mar de cada un dos departamentos territoriais.
3. En caso de imposibilidade de asistir a algunha das sesións, os membros do órgano colexiado poderán ser substituídos pola persoa que designe o presidente. O órgano colexiado precisará de, polo menos, a maioría simple dos membros para a realización da selección. No caso de excepcional ausencia do presidente, actuará como tal o secretario.
4. A reunión da comisión de selección poderá celebrarse presencial ou telematicamente.
5. A comisión poderá propoñer que o órgano instrutor requira a documentación complementaria necesaria para a correcta valoración da solicitude de que se trate.
6. A comisión avaliadora poderá traballar asistida dos asesores que xulgue conveniente, así como solicitar informes a expertos técnicos na materia.
7. A comisión de selección reunirse nunha sesión única para a elaboración da proposta de concesión ao órgano concedente, salvo no caso de que a suma dos investimentos subvencionados dos

expedientes propostos non supere o crédito existente para as axudas, en cuxo caso poderá celebrar cantas sesións considere necesarias, emitindo propostas parciais de concesión en cada unha das sesións.

Artigo 20. *Resolución e aceptación*

1. A resolución das solicitudes correspóndelle á persoa titular da Consellería do Mar, que poderá delegar a dita competencia na persoa titular da Dirección Xeral de Pesca, Acuicultura e Innovación Tecnolóxica. No caso de concesións que superen a contía de 3.000.000 € por persoa beneficiaria, será necesaria a autorización do Consello da Xunta.

2. Esta autorización non implicará a aprobación do gasto, que corresponderá en todo caso ao órgano competente para ditar a resolución de concesión da subvención.

3. O prazo máximo para ditar e notificar a resolución da axuda será de seis meses desde a data de publicación desta orde de convocatoria de axudas no *Diario Oficial de Galicia*. Transcorrido o prazo sen resolución expresa, os interesados poderán entender desestimadas as súas solicitudes, de conformidade co disposto no artigo 25 da Lei 39/2015, do 1 de outubro, do procedemento administrativo común das administracións públicas.

4. Unha vez notificada a dita resolución, o interesado terá un prazo de dez días hábiles a partir do seguinte ao da súa notificación para a aceptación desta. Transcorrido este prazo sen producirse manifestación expresa, entenderase tacitamente aceptada a axuda.

5. A resolución de concesión indicará, entre outros aspectos, os compromisos asumidos polas persoas beneficiarias; os créditos orzamentarios aos que se imputa o gasto; a contía da subvención individualizada e a porcentaxe do financiamento do Fondo Europeo Marítimo, de Pesca e de Acuicultura; os prazos e modo de pago da subvención; e o prazo e a forma de xustificación por parte da persoa beneficiaria do cumprimento da finalidade para a que se percibe a subvención.

Artigo 21. *Notificacións*

1. As notificacións de resolucións e actos administrativos practicaranse só por medios electrónicos, nos termos previstos na normativa reguladora do procedemento administrativo común.

2. De conformidade co artigo 45.2 da Lei 4/2019, do 17 de xullo, de administración dixital de Galicia, as notificacións electrónicas practicaranse mediante a comparecencia na sede electrónica da Xunta de Galicia e a través do Sistema de Notificación Electrónica de Galicia, Notifica.gal. Este sistema remitirá ás persoas interesadas avisos da posta a disposición das notificacións á conta de correo e/ou teléfono móbil que consten na solicitude. Estes avisos non terán, en ningún caso, efectos

de notificación practicada e a súa falta non impedirá que a notificación sexa considerada plenamente válida.

3. De conformidade co artigo 47 da Lei 4/2019, do 17 de xullo, de administración dixital de Galicia, as persoas interesadas deberán crear e manter o seu enderezo electrónico habilitado único a través do Sistema de Notificación Electrónica de Galicia - Notifica.gal, para todos os procedementos administrativos tramitados pola Administración xeral e as entidades instrumentais do sector público autonómico. En todo caso, a Administración xeral e as entidades do sector público autonómico de Galicia poderán, de oficio, crear o indicado enderezo, para os efectos de asegurar o cumprimento polas persoas interesadas da súa obriga de relacionarse por medios electrónicos.

4. As notificacións entenderanse practicadas no momento no que se produza o acceso ao seu contido, entendéndose rexeitadas cando transcorresen dez días naturais desde a posta a disposición da notificación sen que se acceda ao seu contido.

5. Se o envío da notificación electrónica non fose posible por problemas técnicos, practicarase a notificación polos medios previstos na normativa reguladora do procedemento administrativo común.

Artigo 22. *Recursos*

1. Contra a resolución expresa que se dite, que pon fin á vía administrativa, cabe interpoñer recurso potestativo de reposición ante a persoa titular da Consellería do Mar, no prazo dun (1) mes ou recurso contencioso-administrativo ante a Sala do contencioso-administrativo do Tribunal Superior de Xustiza de Galicia no prazo de dous (2) meses contados, en ambos os casos, desde o día seguinte ao da súa notificación.

2. Se, transcorrido o prazo para resolver establecido no artigo 20, non lle é notificada a resolución ao interesado, entenderase desestimada por silencio negativo e caberá interpoñer recurso potestativo de reposición ante a persoa titular da Consellería do Mar, en calquera momento, ou recurso contencioso-administrativo ante a Sala do contencioso-administrativo do Tribunal Superior de Xustiza de Galicia no prazo de seis (6) meses, contados, en ambos os casos, a partir do día seguinte ao que se produza o acto presunto.

3. Sen prexuízo do anterior, os interesados poderán exercer calquera outro recurso que consideren oportuno.

Artigo 23. *Modificación da resolución*

1. Unha vez ditada a resolución de concesión, e antes da presentación da xustificación de cobramento, toda alteración das condicións tidas en conta para a concesión da subvención ou a obtención concorrente de subvencións e axudas concedidas por outras administracións ou entes públicos ou privados, nacionais ou internacionais, poderá dar lugar á súa modificación.

2. A autorización para a modificación dos termos nos que foi concedida a axuda quedará condicionada aos seguintes requisitos:

- a) Que o proxecto modificado non poida dar lugar a unha nova análise da solicitude.
- b) Que a actividade, conduta ou modificación do proxecto estea comprendida dentro da finalidade destas bases reguladoras e da convocatoria oportuna.
- c) Que a modificación non cause prexuízo a terceiros.
- d) Que os novos elementos e circunstancias que motiven a modificación, de concorreren na concesión inicial, non supuxesen a denegación da subvención.
- e) Que o proxecto modificado, no caso de que fose presentado co resto das solicitudes, resultase seleccionado na concesión inicial, seguindo os criterios de selección fixados.

3. As modificacións deberán ser solicitadas pola persoa beneficiaria, por escrito, con anterioridade á súa realización, nun prazo non inferior a dous meses antes da data límite de xustificación do investimento e requirirá resolución expresa da Consellería do Mar. Na solicitude, a persoa beneficiaria deberá deixar constancia, debidamente motivada, das razóns que aconsellan a modificación proposta.

4. Non se admitirán nin se aprobarán modificacións que supoñan unha execución total inferior ao 60% do investimento inicialmente aprobado e, en ningún caso, poderán supoñer un incremento da subvención concedida.

5. Non obstante o indicado nos parágrafos anteriores, poderanse autorizar modificacións que se orixinen por causas de forza maior ou situacións sobrevidas suficientemente xustificadas que, en todo caso, deberán ser apreciadas polo órgano concedente e debidamente motivadas.

6. Non se admitirá a subrogación dun novo propietario na condición de solicitante ou persoa beneficiaria das axudas, excepto nos casos de enfermidade que dificulte ou imposibilite a realización desta actividade, sucesión *mortis causa*, adquisición da propiedade como consecuencia de procesos de disolución e liquidación de persoas xurídicas, operacións de fusión ou escisión parcial ou total de sociedades ou naqueloutros casos nos que, a xuízo do órgano competente para a concesión das

axudas, a transmisión da propiedade do investimento subvencionado e a subrogación do novo propietario na posición do solicitante ou persoa beneficiaria non desvirtúe a finalidade das axudas e non produza enriquecemento. En calquera caso, a nova persoa beneficiaria deberá cumprir os requisitos desta orde e asumir as obrigas derivadas da concesión.

7. As modificacións nos prazos de xustificación dos investimentos terán a consideración de alteración das condicións tidas en conta para a concesión da subvención e, polo tanto, deberán tramitarse de acordo co establecido no presente artigo.

8. O acto polo cal se acorde a modificación da resolución de concesión ou, se é o caso, a súa denegación, será ditado polo órgano concedente, unha vez instruído o correspondente expediente, no que se dará audiencia ao interesado. Con todo, poderase prescindir deste trámite de audiencia cando non figuren no procedemento nin se teñan en conta na resolución outros feitos, alegacións ou probas que as aducidas polo interesado.

Artigo 24. Actas de fin de obra/investimento

1. A realización do investimento xustificarase mediante a oportuna acta de fin de obra/investimento, mediante certificación dos servizos da Consellería do Mar, que se solicitará coa propia presentación do expediente para o pago, nos mesmos termos e condicións establecidos no artigo 12, puntos 5 a 7.

2. Exceptúanse dos puntos anteriores aqueles investimentos nos que o importe da subvención sexa inferior a 9.000 €. Nestes casos a realización do investimento xustificarase coas facturas e certificación bancaria dos pagos correspondentes ás devanditas facturas, así como cunha declaración responsable do interesado (anexo VI) de que o dito investimento foi realizado segundo a resolución de concesión.

A Consellería poderá, en calquera momento, realizar as comprobacións que considere oportunas para verificar a efectiva e correcta realización dos investimentos antes mencionados.

Artigo 25. Prazos de execución, xustificación e pagamento

1. Con carácter xeral, o prazo para a xustificación material e documental dos investimentos será o 30 de setembro de 2026, salvo que a resolución individual de concesión da axuda dispoña dun prazo distinto.

2. Transcorrido o prazo indicado sen que a persoa beneficiaria presente a documentación xustificativa, procederase segundo o artigo 45 do Regulamento de subvencións de Galicia.

3. Para o pago da axuda é imprescindible o cumprimento dos seguintes requisitos:

a) Que o investimento obxecto da axuda e a súa xustificación estean realizados de conformidade coa resolución de concesión, integramente finalizado e totalmente pagado. A acreditación da realización do investimento realizarase coa certificación de fin de obra regulada no artigo 24 desta Orde.

No caso de que a axuda sexa un proxecto vinculado, só se poderá pagar se todos os buques realizan o devandito investimento.

b) Que as persoas beneficiarias estean ao corrente nas súas obrigacións tributarias e da Seguridade Social e que non teñan pendente de pago ningunha outra débeda, por ningún concepto, coa Administración pública da Comunidade Autónoma de Galicia. Igualmente, a persoa beneficiaria non terá pendente de pago ningunha obriga por reintegro de subvencións.

4. As solicitudes de pagamento presentaranse conforme ao disposto no artigo 14 desta orde reguladora, en calquera das formas previstas nos artigos 14 e 16.4 da Lei 39/2015, do 1 de outubro, do procedemento administrativo común das administracións públicas.

As solicitudes deberán conter a seguinte documentación:

– Anexo VII, relativo á declaración responsable doutras axudas, compromiso do requisito de admisibilidade e indicadores de resultado.

– Facturas detalladas do investimento realizado.

No caso de que os beneficiarios sexan unha pluralidade de persoas, as facturas deben estar emitidas a nome de cada beneficiario pola porcentaxe de axuda concedida que lle corresponda, segundo o indicado na resolución de concesión.

– Documento de concesións, autorizacións, permisos ou licenzas para levar a cabo os investimentos previstos e para a instalación e o funcionamento do establecemento, no caso de non achegalo antes da concesión da axuda.

– Certificación bancaria acreditativa dos pagos realizados correspondentes ás mencionadas facturas. Os certificados bancarios indicarán a factura ou facturas que soportan. Os pagos teranse que realizar obrigatoriamente mediante transferencia bancaria.

No caso de que as persoas beneficiarias sexan unha pluralidade de persoas, os pagos deben estar realizados a nome de cada beneficiario pola porcentaxe de axuda concedida que lle corresponda, segundo o indicado na resolución de concesión.

– Anexo VI, declaración responsable de fin de obra, no seu caso.

5. No caso de que o investimento fose xustificado por menor contía que a considerada como elixible inicialmente, minorarase a axuda na mesma proporción, sempre que esta minoración na xustificación da axuda non afecte aspectos fundamentais do proxecto e non supoña unha execución deficiente deste. En calquera caso, unha xustificación inferior ao 60% do investimento inicialmente concedido, implicará a perda ao dereito de cobramento da axuda.

6. No suposto de falta de xustificación documental ou material, a persoa beneficiaria perderá o dereito ao cobro total ou parcial da subvención, segundo os casos.

7. En todo caso, o gasto debe aboarse nos prazos de pagamento previstos na normativa sectorial que lle sexa de aplicación ou, na súa falta, nos establecidos na Lei 3/2004, do 29 de decembro, pola que se establecen medidas de loita contra amorosidade nas operacións comerciais, en cumprimento do establecido no artigo 31.2 da Lei 38/2003, do 17 de novembro, xeral de subvencións.

Artigo 26. *Garantías*

1. No caso de axudas con varias anualidades, será necesario para o pago de cada unha delas, excepto a última, a presentación dunha garantía en forma de aval bancario do 110% da cantidade que hai que pagar, segundo o previsto nos artigos 62 e 67 do Decreto 11/2009, do 8 de xaneiro, polo que se aproba o regulamento da Lei 9/2007, do 13 de xuño, de subvencións de Galicia.

2. Estes avais deberán presentarse ante a Caixa Xeral de Depósitos da Consellería de Facenda e Administración Pública da Comunidade Autónoma de Galicia, segundo o previsto no capítulo II do título IV do aludido Decreto.

3. Unha vez comprobada a realización da actividade ou proxecto para o que se concedeu a subvención, as garantías serán liberadas.

4. Quedan exoneradas da constitución de garantía as persoas beneficiarias das subvencións concedidas das que os pagos non superen os 18.000 euros, segundo o previsto no artigo 65.4 do repetido Decreto.

Artigo 27. *Reintegro das axudas*

1. Se a persoa beneficiaria incumpre calquera dos requisitos establecidos nestas bases e demais normas aplicables, así como as condicións e obrigacións que, no seu caso, se establezan na resolución

de concesión da axuda, poderanse anular os beneficios concedidos co deber de reintegro da axuda ou subvención.

2. Procederá o reintegro total ou parcial da subvención concedida, así como os xuros de mora correspondentes, desde o momento do pagamento da subvención e ata a data na que se acorde a procedencia do reintegro, nos supostos establecidos nos artigos 33 da Lei 9/2007, do 13 de xuño, de subvencións de Galicia, e 74 a 76 do Decreto 11/2009, do 8 de xaneiro, polo que se aproba o seu regulamento.

3. Ademais, será tamén causa de reintegro, de acordo coas directrices comunitarias para o exame das axudas estatais no sector da pesca e da acuicultura (2008/C84/06), a comisión de infracción ao dereito comunitario por parte da persoa beneficiaria e, en especial, ás normas da política pesqueira común durante o período cuberto pola subvención. O reembolso das axudas será proporcional á gravidade da infracción cometida.

4. Sen prexuízo do deber de reintegro, se como consecuencia dunha comprobación posterior ou de calquera outra verificación, se constata falsidade nas declaracións mencionadas nesta Orde, serán de aplicación as infraccións e sancións establecidas na Lei 9/2007, de subvencións de Galicia.

5. Para este procedemento de reintegro terase en conta o establecido no capítulo II do título II da Lei de subvencións de Galicia.

Artigo 28. Infraccións e sancións

Sen prexuízo do establecido nos puntos anteriores, ás persoas beneficiarias das axudas reguladas nestas bases seralles de aplicación o réxime de infraccións e sancións previsto no título IV da Lei de subvencións de Galicia.

Artigo 29. Transparencia e bo goberno

1. Deberá darse cumprimento ás obrigas de transparencia contidas no artigo 17 da Lei 1/2016, do 18 de xaneiro, de transparencia e bo goberno, e no artigo 15 da Lei 9/2007, do 13 de xuño, de subvencións de Galicia.

2. En virtude do disposto no artigo 4 da Lei 1/2016, do 18 de xaneiro, de transparencia e bo goberno, as persoas físicas e xurídicas beneficiarias de subvencións están obrigadas a subministrarlle á administración, ao organismo ou á entidade das previstas no artigo 3.1 da devandita lei, á que se atopen vinculadas, previo requirimento, toda a información necesaria para o cumprimento por aquela das obrigas previstas no título I da citada lei.

Artigo 30. *Servizo Nacional de Coordinación Antifraude*

Calquera persoa que teña coñecemento de feitos que poidan ser constitutivos de fraude ou irregularidade en relación con proxectos ou operacións financiados total ou parcialmente con cargo a fondos procedentes da Unión Europea no marco da presente convocatoria, poderá poñer os devanditos feitos no coñecemento do Servizo Nacional de Coordinación Antifraude da Intervención Xeral da Administración do Estado, polos medios electrónicos a través da canle habilitada para o efecto polo devandito servizo na dirección web <https://www.igae.pap.hacienda.gob.es/sitios/igae/es-ERES/CA-UACI/Paginas/CA-UACI.aspx>, e nos termos establecidos na Comunicación 1/2017, do 6 de abril, que se pode consultar na dirección web <https://www.igae.pap.hacienda.gob.es/sitios/igae/es-ERES/CA-UACI/SNCA/Paginas/ComunicacionSNCA.aspx>.

Artigo 31. *Publicidade*

1. En aplicación do establecido no artigo 15 da Lei 9/2007, do 13 de xuño, de subvencións de Galicia, serán obxecto de publicación no *Diario Oficial de Galicia* as axudas concedidas, expresando a convocatoria, programa e crédito orzamentario a que se imputan, a persoa beneficiaria, a cantidade concedida e a finalidade da subvención, coas excepcións previstas no devandito artigo, no seu caso. A aceptación da axuda supón a inclusión da operación e os seus datos na lista pública de operacións prevista de acordo co artigo 49.3 do Regulamento (UE) nº 2021/1060.

2. Así mesmo, serán igualmente obxecto de publicidade a través da páxina web da Consellería do Mar (<http://mar.xunta.gal/>) a relación de beneficiarios e o importe das axudas concedidas.

3. Por outra parte, de conformidade co previsto nos artigos 17.3.b) e 20.8.a) da Lei 38/2003, do 17 de novembro, xeral de subvencións, transmitiráselle á Base de datos nacional de subvencións a información requirida por esta, o texto da convocatoria para a súa publicación na citada base e o seu extracto no *Diario Oficial de Galicia*.

Disposición adicional primeira

No non previsto nesta Orde observarse o que establece o Regulamento (UE) nº 2021/1139 do Parlamento Europeo e do Consello de 7 de xullo de 2021, polo que se establece o Fondo Europeo Marítimo, de Pesca e de Acuicultura e polo que se modifica o Regulamento (UE) 2017/1004; Regulamento (UE) 2021/1060 do Parlamento Europeo e do Consello, do 24 de xuño de 2021, que establece as disposicións comúns relativas ao Fondo Europeo de Desenvolvemento Rexional, ao Fondo Social Europeo Plus, ao Fondo de Cohesión, ao Fondo de Transición Xusta e ao Fondo Europeo Marítimo, de Pesca e de Acuicultura, así como as normas financeiras para os ditos fondos e para o

Fondo de Asilo, Migración e Integración, o Fondo de Seguridade Interior e o Instrumento de Apoio Financeiro á Xestión de Fronteiras e á Política de Visados; o texto refundido da Lei de réxime financeiro e orzamentario de Galicia, aprobado polo Decreto legislativo 1/1999, do 7 de outubro e posteriores modificacións; o disposto na Lei 9/2007, do 13 de xuño, de subvencións de Galicia; o Decreto 11/2009, do 8 de xaneiro, polo que se aproba o seu regulamento; os preceptos básicos da Lei 38/2003, do 17 de novembro, xeneral de subvencións, e os do seu regulamento de execución; e a Lei 39/2015, do 1 de outubro, do procedemento administrativo común das administracións públicas; e demais normativa de aplicación.

Disposición adicional segunda.

Delégase no director xeral de Pesca, Acuicultura e Innovación Tecnolóxica a resolución destas axudas.

Disposición derradeira primeira.

Facúltase ao director xeral de Pesca, Acuicultura e Innovación Tecnolóxica para ditar as resolucións necesarias para o desenvolvemento e aplicación desta Orde.

Disposición derradeira segunda.

Esta Orde producirá efectos a partir do día seguinte ao da súa publicación no *Diario Oficial de Galicia*.

Santiago de Compostela, 26 de decembro de 2025

Marta Villaverde Acuña

Conselleira do Mar